

權載之文集

開化圖書館

Kaishwa Library

七

開化圖書館

Kaishua library

開化圖書館

Kaishua library

開化圖書館

kaikua library

權載之文集卷第四十一

唐權德輿字載之

書

附柳福州書

冕白昔仲弓問爲政子曰先有司有司之政在於舉士  
是以三代尚德尊其教化故其人賢西漢尚儒明其理  
亂故其人智後漢尚章句師其傳習故其人守名節魏  
晉尚姓美其氏族故其人多矜伐隋氏尚吏道貴其官  
位故其人寡廉恥唐承隋法不改其理此天下所以待  
聖主正之何者進士以詩賦取人不先理道明經以墨

義考試不本儒意選以書判殿最不尊人物故吏道之  
理天下天下犇競而無廉恥者以教之者末也閣下豈  
不謂然乎自頃有司試明經奏請每經問義十道五道  
全寫疏五道全寫注其有明聖人之道盡六經之意而  
不能誦疏與注一切弃之恐清識之士無由而進腐儒  
之生比肩登第不亦失乎閣下因從容啟明主稍革其  
弊奏爲二等其有明六經之義合先王之道者以爲上  
等其有精於誦注者與精於誦疏者以爲次等不登此  
二科者以爲下等不亦善乎且明六經之義合先王之  
道君子之儒教之本也明六經之注與六經之疏小人

之儒教之末也今者先章句之儒後君子之儒以求清  
識之士不亦難乎是以天下至大士人至衆而人物殄  
瘁廉恥不興者亦在取士之道未盡其術也誠能革其  
弊尊其本舉君子之儒先於理行者俾之入仕卽清識  
君子也俾之位朝卽王公大人也一年得一二八十  
年得一二百人三十年得五六百人卽海內人物不亦  
盛乎昔唐虞之盛也十六族而已周之興也十亂而已  
漢之王也三傑而已太宗之聖也十八學士而已豈多  
乎哉今海內人物顯然而理推而廣之以風天下卽天  
下之士靡然而至矣是則由於有司以化天下天下之

士得無廉恥乎冕頓首六月十四日

答柳福州書

來問見愛殷勤甚厚疏以先師對仲弓先有司之說又曰由於有司以風天下誠哉大君子之言理道也今之取士在於禮部吏部按資格以擬官奏即官以考一作別

判失權衡輕重之本無乃甚乎至於禮部求才猶似爲仁由已然亦公於時風豈能自振嘗讀劉秩祭酒上疏云太學設官職在造士士不知方時無賢才臣之罪也每讀至此心常慕之當時置於國庠似在散地而方以乏賢內訟慨然上奏此君子之心也君子之言也况以



蒙劣辱當儀曹爲時求人豈敢容易然再歲計偕多有  
親故進士初榜有之帖落有之策落有之及第亦有之  
不以私害公不以名廢實不敢自愛不訪於人兩漢設  
科本於射策故公孫宏董仲舒之倫痛言理道近者祖  
習綺靡過於雕蟲謂之甲賦律詩儷偶對屬况十數年  
間至大官右職教化所繫其若是乎是以半年以來叅  
考對策不訪名物不徵隱奧求通理而已求辯惑而已  
習常而力不足者則不能回復於此故或得其人庶他  
時有通識懿文可以持重不遷者而不盡在於齷齪科  
第也明經問義有幸中所記者則書不停綴令一有通  
釋字

其意則墻面木偶遂列上第末如之何頃者叅伍其間  
令書釋意義則於疏注之內苟刪撮旨要有數句而通  
者昧其理而未盡有數紙而黜者雖未盡善庶稍得之  
至於來問明六經之義合先王之道而不在於注疏者  
雖今吏部學究一經之科每歲一人猶慮其不能至也  
且明經者仕進之多數也注疏者猶可以質驗也不者  
儻有司率情下上其手旣失其末又不得其本則蕩然  
矣無乃然乎古人云強勉行道則德日起而大有功中  
庸有困而行之勉強而行之鄙雖不敏敢忘勉之之道  
邪大凡常情爲近習所勝沒沒於聞見汲汲於進取苟

避患忝俾躬處休以至老死自爲得計豈復有揣摩古  
今風俗整齊教化根本原始要終長轡遠馭如閣下吐  
論若是者耶此鄙人所以喟然三復而不知其已也來  
問又言三代兩漢至近古所尚不同豈古化復遠之不  
可復因緣漸靡而操執者不之思耶鄙人頑固謹俟餘  
論因自發舒慙忤無量德輿再拜八月十一日

與張秘監書

頃因從容縱言遂及曩歲與外舅相國有徃復書猥見  
徵求出於眷愛休沐發篋追懷愴然因思弱植長自湖  
海閉關開卷孤特寡徒或有所得則三復喟嘆所務峭

峻益爲迂野蓋自量力而欲希蹤古人故書中多有此  
意今則聊復自哂亦當時志之所在而不能自巳也建  
中初年及弱冠方以環衛掾曹爲今司空漕輓從事抵  
鍾陵經信部時外舅自都曹郎出爲郡佐話言歡甚淹  
留累夕約爲伯仲申以久要鄙人以年位不倫慮非宜  
適且合志營道豈待約結而後固耶外舅曰僕爲監察  
御史時司空楊公已爲祭酒太常又年長十九歲而許  
僕以兄事何足下今日見拒之深耶時房州罷浦陽長  
在座因指之曰請亦敦此義其間嘉言道論函丈更僕  
雖農山濠上無以過也迨歸江南俄致天書慕荀陳之義

結潘楊之好緘詞勤勤雅有古風無言不訓感慨相許  
爾後數年方展嘉禮旋屬外舅以本官叅台司操簡修  
賀輒申直諒亦旣病被累章乞身平生所蘊頗同不試  
噉夫人之才有能有不能當夫司諫隱詞皆體國後以  
區區建安之守逢京師變故密疏行宮陳匡復之略移  
書強藩徼誠順之義其他議論風彩凜然有大丈夫之  
節斯不可及已與夫刺促顧慮沉浮自愛者豈同日邪  
明年所疾不起前此友壻天落故有二祭文以寄悲懷  
七年秋猥辱朝命以博士徵至京師十數年間累有外  
故與建昌房州之喪表墓申奠直書而已因緣故舊臨

紙泣然今亦附於書末庶見其闔門士行之有類也兩書之外又有其時尺書數紙屬在卷中因復連寫倏忽二紀無非風燭士感見知如何可言頃年祇役江西在路有寄內詩一首音詞蕪陋顧非士衡彥先之比頃常馬上偶誦今亦具之往復書并墓銘奠文等共十餘篇以兄與外舅有江湖遊處之書又鄙人承眷特深雄詞載筆博物閱覽賢士大夫之淑聲家法固周知之感念陳跡輸於醬瓿非敢以文爲事也不宣德輿再拜正月二十五日

附  
答書

奉榮問蒙示相國崔公往復書并諸墓銘奠文及江西  
路上之作詞致清深華彩巨麗言必合雅情皆中節瓊  
瑰見辱囊篋增輝又竊文矩不勝幸甚相國於薦中表  
丈人行也寶應中相國丈被褐營道寓居陸陽薦家於  
邗溝耕於謝湖海歲春執秋穫途由漕浦相國丈時與  
故刑部劉尙書趙洋州戶部兄弟同客是邑或承餘眷  
留歡浹日無曠再時者數焉泊相國丈以廷尉評賓於  
姑胥之幕自柱下史退爲臨川掾薦皆獲見於湖海之  
間惠然相念有踰曩歲其後作牧建安屬京師難故猶  
能抗大節飛密疏犇問官守遠達巴梁薦掌史者嘗記

興元元年三月甲子詔書以建州使者舒鄧玠爲嘉王  
府諮議玠之所奉卽相國丈也奏章於多難之日陳謀  
於必勝之地由是見器於助主先定於中台及夫徵入  
果領樞務惜其憂勤爲疾未幾辭免大庇生人之志徒  
鬱於襟抱以至於薨落指紳先生所以長嘆息者抑有  
爲焉相國丈與劉齊二公燮諧大政也薦蒙過聽之遇  
以博士再入東觀三相連步同送拜職榮之於心寧止  
迄今閣老以志學之歲下帷覃思與古人心會於經誥  
之上獨行乎貞朗之域逮於弱冠德輝彰聞相國大傾  
慕之不足願申以姻好詎假媒介直操槩簡閣老感深



見托敬諾嘉命磊落丈夫之事二君子交脩之甚休精  
識妙鑒得賢斯盛旣而夫貴於朝妻尊於室崔門緩帶  
之慶其有極乎及覽後書援皇極元德之論指匡張孔  
馬之戒實當益友之目豈惟佳婿而已又觀建昌房州  
誌文等昔年亦同遊處嘉聞遺諮過作者而不朽矣至  
如置奠東武之嗣興慟子咸之述繼美彥先之句諷而  
誦之寶而藏之有以見六義昭宣百行醇備名稱赫赫  
宜乎哉走素不敏猥列僚舊豈悞見厚投以至言也因  
懷昔遊聊占數

字發

夷

蓼侯謚曰

嗣侯

諸吏

藜作子彥

太常

孝廉

柎子文

最子產

臧

琳茂

黃

季彥

侯 關內

按連藜云魏相小子之子彥以其功封蓼侯生臧按家

語叙孔氏之代云魏相小子子文生最字子產封蓼侯  
謚曰夷生臧據此藜所云小子卽子文矣但藜云子彥  
家語日子產是傳寫之差未詳何者爲是按連藜臧與  
子琳書中云侍中子國不言屬之遠近以孔子世家及  
家語推校安國以與臧爲從祖昆弟世家稱安國生印  
藜云子國生子印蓋尊異先子而加之以子則子立以  
下皆此例 云鮒弟子襄或者以爲鮒弟之子曰  
襄今按家語及藜則鮒之弟日子襄明矣 藜云孔  
仲和是襄後十四代按此是十一代又云仲和曾祖名  
季崔按此是子建疑子建是季崔子家語孔子二十世

孫有孔晁未詳分自何代 藜云季彥宗人仲又君魚  
宗人子通並未詳分自何代 家語云子國孫衍未  
詳是仲驩昆弟復是仲驩之宗藜云褒成君第二子之  
後君魚爲武都太守君魚弟奇字子異著左氏義話按  
孔光傳褒成君霸第二子爲捷但未詳其後代幾至君  
魚 右按史記孔子世家漢書孔光傳授漢書儒  
林孔禧傳及家語與藜相推校而未詳者闕焉

權載之文集卷第四十一

權載之文集卷第四十二

唐權德輿字載之

書

與黜陟使柳諫議書

某月日試秘書省校書郎權德輿

云云

德輿材實無能

重以拙訥雖星輶往復皆獲趨拜竟未得粗承餘論少  
盡下情伏蒙以通世之舊將獻狀受祿感戴循環不知  
所措或有所見敢布愚衷何者今皇帝馭天下之初將  
欲拔才俊延幽滯綜覈名實覽觀風俗故分詔近臣省  
問四方將天之命其旨不細則閣下舉一士用一賢必

當躬驗聲實精究終始一旦以愚當薦士之日誠衆多  
所未喻也凡以故舊之私不能忘情與夫推賢類能其  
事則異今者澄清省察以得人爲功直道公議天下屬  
目此時而失則所失多矣德輿伏膺儒行三十未立忖  
躬責已知不如人俟他時進脩與諸生齒方與當大君  
子眷念之至申鄙夫報效之分今者若以費用所迫苟  
進一官則傭書販舂亦足自給必不敢以區區之身上  
累名器敢拒黜教之食徐受山濤之恩下情所守在此  
而已是以竟未獲拜謝者以必所不當也伏惟宴間之  
餘俯察愚朴文章鄙略不足以煩省覽用此陳露慙畏

伏深不宣德輿再拜

與陸州杜給事書

十二月九日試右金吾衛兵曹參軍權德輿謹遣蒼頭  
獻書於給事杜公閣下德輿顛蒙小生行藝無取世業  
儒術不能自奮徒以晨羞之暇取適文誼師蘧生欲寡  
其過之言慕太邱平心率物之道弱年多病志無所就  
衡茅之中俯仰自愧去年得以物役道於貴州舟次仁  
境心口相賀一躡賓階鄙妄都盡何者嚮風之心久積  
於中不知所已然而然也及夫承至論聞格言懸榻之  
禮禮有加等深明出處之分根極道義之本初勗之以

勉職又勗之以通經駑薄賤姿誠不自意拜賜之時感  
 入心腑及就安環堵靜守緒言常慮行之不至忝辱明  
 鑒近又承寓書於包中丞丈過有稱賞永懷慙戴何可  
 言喻噉夫先師有互鄉之見與其進也至東漢郭泰陳  
 蕃之徒亦以獎鑒士林為已任降及近古此道寢微今  
 江南多士所湊埒於上國力行修詞人人自勵月旦之  
 評或無至公衆情所望實在閣下伏恐清口鑒於此一  
 失物論云云以之去就下情所虞在此而已如小生者  
 但欲稽考古訓端正心源以區區直方展微贄於他日  
 不宣德輿再拜



附 崔左司書

造白僕嘗以道喪日久罕見君子間者奉睹得聞循上  
之方體仁之度言發理契心朗目明涉道之誠若乘川  
而得舟楫其慰盛也寤寐自賀竊思前賢心感之重義  
叶之固或約之以朋友或申之以婚姻聚之以里閭悅  
之以宴好俾一日之合爲累世之歡裔嗣承流清風自  
遠克成貞潔之業永稱道德之門卽潁川荀陳蓋其事  
也僕不揆鄙固景行行之早年嘗與二三情友約誠同  
此世物多故志爲事奪存沒有間通塞殊尚今中年已  
及此心猶阻永懷愧歎怵怍如厲幸以罪廢貶秩向終

法尚放還歸齒田里追懼前失澡勵愚衷咨諭弟兄導  
率妻子甘與時絕永安邱樊息女二人姿性及義以靜  
約爲尚以琴書爲適庶可以承君子之好備有道之室  
長女先約故司徒元子宏農楊宏微幼女未笄顧繼德  
嗣北歸之日敬俟嘉命夫人之生母道之動也動而能  
靜是謂返本僕婚嫁旣畢退身巖阿靜以營神虛以順  
命與骨肉姻戚蹈道爲期還復之中庶乎返本未審足  
下以爲如何遠布所懷跂聞雅論造頓首三月二十一  
日

答左司崔員外書

德輿器用瑣薄無他才術徒以木訥之姿翫習聖賢之

訓嘗以爲大和

一作朴

久散世道交喪師友之義缺醜薄

之風起蚩蚩萬情無所司南銜憤結懷惄然終日前年  
得以行役獲覲德容蒙泛愛竟接清議初論當世之理  
要次陳情性之大端終語道德之原極澡雪百慮泊然  
葆真一聞至論神開意警不覺虛白澄曠浹洽四支則  
易直子諒又其細也當此時誠欲備門弟子之數展嚴  
師之敬雖此志不遂實念遇逾涯忘年之歡契比伯仲  
昨者奉問洞見仁衷且有退身邱樊之說噦夫中人之  
域或不以利回而多以名敗或時能蹈義而鮮以仁克

此誠細者可力大端則循性而動矣至於黜聰晦明恬  
於退讓息浩然之氣哀樂不入不然則乘時致位以天  
下爲已任變醜爲醇澤流無垠彝倫式叙生生茂遂此  
誠大君子之出處也近古已來作者實鮮豈世運有在  
或時無其人間睹皇極綜論之一篇得之盡矣然則或  
進或退小屈小伸豈足爲執事者道也又示問之中情  
旨備至不棄弱植申以嘉姻荀陳之義非所敢當况司  
徒令子爲後名輩精識洞鑒誠已得之鄙人何堪後當  
此命門間之下珉玉不侔將何以祇承厚意當叔寶逸  
少之目恐累清德無任下情已具諮聞敬承嘉命尋臯

拜謝感慶伏深謹狀

賀外舅崔相國書

伏惟大方全德自中發外蘊爲志氣播爲事業然則阜  
庶生物操持化權結於衆心爲日固久且大賢之出處  
天下之否泰也故詔下之日人人相慶又早歲獲睹皇  
極綜論元德志孤雲賦淒風詩伏讀累日備見精慮之  
所至言理亂者多推世運於必然殊不知弛張變化存  
乎其人而已自古賢哲之徒或志尚不展鬱堙當世長  
嘆痛哭於是乎作伏惟以嘗所感慨申於盛明使三辰  
光潤萬物軌道實在指顧豈逃殼中且以西漢公輔言

之蕭曹以清靜熙帝載良平以謨明贊王業至宣帝時則魏相通故事邴吉知大體斯皆章章可言者也洎夫張蒼之律歷孫宏之文章韋賢之好學平當之有恥然亦號爲賢相抑其次焉至匡張孔馬服儒衣冠被阿諛之譏不勝其任最下則陶清劉舍莊青翟趙周之徒皆齟齬備位故身名偕泯夫此數子者豈不粗知君臣之道古今之變哉痛於無所發明保持祿位而已有時無功可不謂大哀乎又古人有立德立功立言之訓顧惟多幸獲覽炳然之文又備承餘論有以見大君子之遺辭發慮宏裕溥博者矣惟德與功安在今日洒天下之

耳目復萬物於全性在大人踐而行之守而終之而已  
不宣再拜

附 獨孤秀才書

貞元十三年八月日獨孤郁謹上書於舍人三兄閣下  
郁以世舊遂獲謁叙故大賢之遇郁也亦不以常交言  
之際眷意甚露郁瑣瑣鬱堙二年無聞摧頽折羽而不  
意者非失意之謂非尤人之謂蓋將因事自罪而不意  
也借如豫意生於擁腫小木之中樵蘓見之亦以嗟矣  
一有不嗟則必自與擁腫者亦不多遠也珠璣隱於礫  
石之中童子弄之亦以驚矣一有不驚則必自與礫石

者亦不多遠也。鑲錒卧於鉛鈍之下，良工覩之固亦知矣。一有不知則必自與鉛鈍者亦不多遠矣。毛嬙後於宿瘤而行，有目者覩之固即分矣。一有不知則必自與宿瘤亦不遠矣。苟與乎擁腫礫石、鉛鈍宿瘤輩果一無字殊異不能移，凡眼所擇况遇者一作逃乎良工巧冶有識之目哉！今禮部侍郎之目固亦國之良工巧冶有識之目也。於中再擇再不中是直已爲擁腫礫石、鉛鈍宿瘤矣。何止與其不遠哉！此所以因事自罪而不憚也。或諭之曰：今之道尚光子之所以不振者，晦過也。子之道豐蔀也。子且直有崑天之材而隱植之，有照乘之珍而密櫝



之有切玉之利而謹禕之有傾都之艷而深帷之雖使  
離婁左執光而右拭皆迫而索之固亦不能知子矣何  
不移植露光披鋒示貌使識者覩而駭之彼之所誨固  
亦郁所不能焉已必不材也必不寶也必不姝也必不  
利也且遍過於有識者之目是自揚其短也已必材也  
必寶也必姝也必利也雖小示其光鋒幹貌於一人驚  
我亦已多矣所不驚者是子四事果不足異於族凡也  
郁病直拙獨大賢於郁分殊尚不能以亟况悠悠者歟  
郁常行乎時輩之間多酌其言語善者鄙者而自減盈  
消息其旨稍有可驚不敢不於許言者言之今之後學

者或嘆曰吁後烏乎所歸哉此且非宜長者所當聞也  
 亦非宜長者所不當聞也今朝廷先達病在不能公也  
 或能公而不能甚力也覽其文則贊美積一作稱嗟無不  
 至也其間善惡輕重進退則心以別矣此其所以為公  
 也鮮有知其必善而風鼓之不管若自其口出此其所  
 以為公不能甚力致使遑遑之倫其下才者亦曰今夫  
 在位者其無公歟其無心歟有一善未嘗肯稱也意曰  
 非我事也又慮與之談者不與我符契是使諸子竊竊  
 然自以無聞為不辱遂相與擇捷趨邪紛屯於主司之  
 跡親者苟能致譽則不詰其所以致譽者之賢不肖而

曹趨之矣此實今之躁進苟得之風也在朝廷大賢主  
而名之驅而正之於其善者扶搖之有善而未具者決  
之導之使四方學士知嚮方焉如其曰非我事也若  
使一人曰非我事也十人曰非我事也舉朝廷皆曰非  
我事也苟非我事則無所不非我事無所不非我事則  
天地之間無乃已寂寥乎昔孔子飾詩書禮樂以化齊  
弟子而至天下使孔子亦曰非我事則今者安盡聞夫  
七十子之賢詩書禮樂之盛七十子亦曰非我事也又  
孰爲播孔子之聖如此其大乎今文亦如是朝廷先達  
亦如是後之達者亦如是若不相播則人文禮義知已

復往之道不幾乎息乎不肖辱承大賢之心深矣非又  
敢以假喻自薦也意欲以大賢擇衆賢如七十子之徒  
亦方孔子於大賢也何如不宣郁再拜

答獨孤秀才書

損四日書問兼示新文閱博峻異有立言致遠之旨焉  
其於惠愛纖悉重厚甚善甚善以吾子才志與年三者  
皆富以家聲自振若建瓴水大冶良工必有不斲至而  
至者况以日日新又日新之盛哉豫章珠璣鏤錫毛嫱  
終不慮隱之櫝之禱之帷之之爲患而爲擁腫礫石鈇  
鈍宿瘤之排蔽但發有疾徐耳來問云一人驚之亦已

多矣豈與族凡校耶此誠得之又云先達病不能公或  
公而不能甚力今夫滔滔者或辯之不至而苟善待之  
及揚聲延譽則鉗口結舌大凡舉世之病也如鄙夫者  
直力不足耳亦懼招徠犇走爲津爲岐至有竊所愛者  
則寡矣又豈能廢是也從古未達者之望達者何常不  
如是耶先師七十子所擬豈敢當也三復懃然無言喻  
懷其他慕重續俟會話德輿頓首

答楊湖南書

使至蒙惠寄制集序發函煥然盈耳溢目宏麗博厚坦  
夷章明如黃鍾大玉慶霄天籟奇采正聲鏗鏘照耀真

可謂作者之表方駕古人忻歡駭悚咏嘆無斃甚盛甚盛但根本不稱獎飾非宜以此爲雄文至鑒之累如何如何書命者古先哲王之所以發德音而賦百職在易曰后以施命告四方書曰誕告萬方詩曰訏謨定命遠猶辰告故君陳君牙畢命罔命之作皆直而文簡而誠含章而不流漢廷亦云文章爾雅訓辭深厚其重如是而鄙人忝焉使盛聖之文明不登於典謨訓誥罪在菲薄其敢逃責於多士耶昔顏氏之子有不善未嘗不知知之未嘗復行雖竊知之之道而職命所拘不能不俟終日而勇退日踐復行之過至於九年暴於四方爲所

觀笑此所慙愧於古人也亦思人生世間當志於遠者  
大者豈數數然剗精耗神攘竊文字而猶力不足意不  
逮雖三益直諒之道久廢獨不愧於心乎昨休沐之餘  
愚子呈閱者以有大朝中外之授受士友遷除之歲時  
遂不計妍媸相從以類初不敢以制集自命但全其文  
而已因其猥多分列卷第又覲然以序引奉煩者誠以  
承眷之深而心仰雄伯使夜光冠於魚目永爲子孫秘  
藏非敢效太沖三都而求元晏發之之道也及覽鴻麗  
之作無非逸言追思內訥已無所及使鄙人涉敝帚自見  
之患陷作者於玉卮無當之嫌一不敏而相交喪何可

言也伏以門中忠節叙述周詳因小生之無似揚先德於不朽伏讀感咽何階仰酬結於肺肝沒齒無極又德音宥宥皆出自中禁而西掖所掌止於命官今序中所言需王澤燭幽滯振刑典申肅殺揄揚宏大務極其言則虛美之中又爲虛美所糞盡去過談方敢受賜耳故吏部李員外三丈寓書於柳秘書求爲後集序此賢達所不能忘懷也但後言失實如楚越之相遼異時見譏於通人則復爲累亦輒爲閣下良規非止於自謀也左曹許公範二紀已來過於賞愛鄙人每以逐臭况之今又遇閣下此作素多昧理忽復自疑幸無泥於眷私而



滅裂公是是所望也載之再拜六月二十五日

權載之文集卷四十二

開化圖書館

Kaishua Library

權載之文集卷第四十三

唐權德輿字載之

表

趙相公謝賜金石麥表

臣某言伏奉恩勅賜臣金石麥并方及服法并金花銀合一又賜臣蘇膏方及眼赤有瘡方其方皇太子書者鴻私榮貺特發天心受恩拜賜慙怖交集臣聞台司之任茂遂羣生而攝衛乖宜自貽病疾理身未暇賦政何堪豈謂上簡宸衷俯矜賤質御方靈藥稠疊寵光劑和至精減聖躬所服翰墨元妙降皇儲之書仰光輝而陋

目增明承渥澤而沉痾自愈致金石之固通性命之和  
保持誨諭曲盡茲旨蠲其煩滯授以康寧省已何功害  
盈知懼伏惟陛下宣布大化則時無疵癘懋建大中則  
物以阜安生及昌期自登壽域况臣劣薄待罪樞衡感  
平施而已深荷殊榮而難報雖陰陽不測犬馬之疾頓  
瘳而日月無私瑩燭之光何補生成覆露皆稟眷慈竭  
力致命豈申愚效無任感恩惶懼之至謹具表陳謝以  
聞貞元九年六月日

盧相公謝中書侍郎表

臣某言伏奉今日恩命除臣中書侍郎同中書門下平

章事祇奉詔命循省妄庸感恩量力不知所措中謝臣  
聞宰相者叙四時之化順萬物之宜用贊裁成使之茂  
遂而中書密勿庶政本源以奉大猷是爲右弼臣實凡  
輩本無他能家尚儒風獲承緒業因緣忝幸踐履班榮  
誠不自意忽焉過量台司待罪已涉三年妨賢旣久內  
訟彌切蓋謹謹誠懼人之常分而訐謨教化宜擇全才  
陛下在宥萬方躬勤百度豈虞賤質再沐睿言特遷紫  
微實玷皇極臣面所陳讓推於至公天鑒未廻進退惶  
灼且假人以器知臣者君猶冀鴻私俯察愚懇害盈之  
禍敢愛微軀覆餗之憂難抑公議無任感恩怖懼之至

謹奉表陳謝以聞臣誠惶誠恐頓首頓首謹言貞元十一年正月六日

賈相公陳乞表

臣某言臣以庸薄循省無堪過蒙聖恩累忝非據自頃歲任汾州刺史後三領節制一叨居守皆出於宸眷曾不因人昨入覲闕庭特蒙叅列台鼎妨賢待罪荏苒四年昧於攝生素又多病眼有醫膜之疾耳聞風雨之聲自趙憬云亡盧邁染患忽忽驚悸舊疹頓加尸素之中視聽不逮樞務至重萬方所瞻得人則理不可暫闕伏望博選才彥上副憂勤雖竊位貪恩猶思自勉而省躬

量力誠所不任非求退讓之名寔爲官謗所迫伏希聖  
鑒俯察懇誠無任惶懇迫切之至謹奉表陳請以聞貞  
元十二年九月四日

盧相公謝賜方藥并陳乞表

臣某言臣自染偏風今已彌月將息未減渥澤轉深伏  
蒙特令供奉僧智昌醫療并每日令中使存問及賜柳  
湯煎驢頭方仍便令服餌者顧以庸賤昧於攝理久茲  
竊位常懼害盈陰陽之和無補時化風毒生疾上煩聖  
慈靈方御醫稠疊備至雖受恩服藥誠合漸瘳而福過  
灾生慮難自保况中貴將命寵臨私門犬馬之微日塵

黈纆或有加減自合上聞非常之恩伏乞停罷且台司  
要重庶政泉源以臣平居素積官謗今右邊手足動用  
不隨自滯枕蓆已淹茲晦伏乞以時免職使得養疾家  
居博求上才用塞人望則公朝無覆餗之責陋質荷生  
成之仁今攝衣拜章力且未足口占代署貴達愚衷無  
任感恩迫切之至謹奉表陳請以聞貞元十二年十月  
一日

第二表

臣某言臣疾病所嬰在假既久自審不逮遂有上陳詔  
書優答懇誠未允屏營慙懼不知所安臣聞爲官擇人



各司其局條責實效共致理平凡在庶寮猶不可曠况  
宰臣之任鼎足承君調和陰陽左右教化能否之下利  
害繫焉苟有所壅其傷必大以臣虛薄備位四年奉勵  
精之勤但樂昌運當具瞻之地莫副羣心書曰百寮師  
師百工惟時言得其人也語曰陳力就列不能者止言  
審其分也况沉頓踰月冠帶未任風毒所侵難望速差  
彼已之刺倍切於今以被病之微臣台司之厚祿自知  
不可如公議何伏枕披誠再黷宸扆與迴天鑒俯遂愚  
衷所謂曲成豈惟平施無任惓欵迫切之至謹奉表陳  
請以聞貞元十二年十月八日

第三表

臣某言臣迫於疾瘵累有陳奏再奉詔旨私願未從感  
恩則深量力難濟况偏風狀候與諸疾不同雖時似小  
減終慮成沉痾中樞務重不可闕人自臣在假已四十  
餘日曠廢斯甚兢惶益深一夫不獲一吏失職則繫聖  
慮以之憂勞今臣手足未平心緒未復卧受豐祿胡顏  
自安伏惟陛下順天理物躬勤庶政事無細大成遂其  
宜豈可獨私微臣久玷時化是以直疏誠懇不敢苟飾  
煩詞冒黷宸嚴期於鑒照無任惶怖震越之至謹奉表  
陳請以聞貞元十二年十月十六日

趙庶子相公謝平章事表

臣某言臣伏奉今日恩制除臣同中書門下平章事祇  
荷成命捧讀詔書心魂震驚拜抃失次

中謝

臣聞燮贊

化源叅和鼎實上合一德以平六符苟非其所繫斯  
重臣本虛薄素無器能徒以文藝獲承代業比肩多士  
陳力清時累叨渥恩踐履官序頃歲奉職中禁草議南  
宮遂忝左曹列於近侍顧常內訟已慮曠官豈謂宸眷  
特加擢任非據伏自循省不知所安且臣去冬尚守郎  
吏今纔一歲遂備台司自非今才難塞公議雖鞠躬匪  
懈必盡事君之誠而宣化賦政恐累知臣之舉生成難

報覆餽是憂伏以面奉德音不敢更有陳讓拜章感涕  
上荅何階無任荷戴惶懼之至謹奉表陳謝以聞貞元  
十二年十月十七日

盧相公陳乞第五表

臣某言臣素以庸虛又嬰疾病半年在假未任出入四  
表上陳備盡誠懇過蒙渥澤特賜優容聖慈則深私願  
猶阻俯仰衽席兢惶靡寧臣本謂至春和得漸平復今  
方藥遍用根本未除雖簪帶假人得以被體而趨步無  
力難於拜恩輔臣之任百辟是仰遵守法度誠所宜先  
豈有踰歲家居尚塵鼎餼况所受厚祿出於疲人竊位

公朝尚知不可沉痾私室何以自安易象害盈寔在今  
日伏惟陛下宏覆萬物曲成不遺凡在懷生各得其所  
以臣沉痾久曠官司前後陳聞披瀝肝膽期切之至謹  
奉表陳請以聞貞元十三年二月二十五日

第六表

臣某言臣待罪非據歲時已深寵秩逾涯灾患自至一  
從移病忽及周月五獻章表未遂血誠沉痾之身滯於  
牀枕職守之效絕於官曹虛費祿廩不安夙夜遂於去  
年五月二十五日進狀乞停俸錢自後不敢更有請受  
竊冀素殮之責少息輿議丹懇之至上迴聖心邇來又

經九十餘日成命未下憂惶無措蓋聞祿以詔功又以  
養賢以臣之愚無功久此尸曠俯仰內訟迫於公私臣  
之情理實為難處臣之言詞不能自達使得終獲退免  
曲遂微誠亭育深恩寔在於此無任猥迫懇款之至謹  
奉表陳乞以聞貞元十三年九月五日

盧相公謝授賓客表

臣某言伏奉今日恩制除臣太子賓客眷慈曲被宏貸  
特加捧承命書感抃交集中謝臣以庸劣累叨鴻私無  
補廟謀徒速官謗妨賢歲久嬰疾日深累陳愚衷上黷  
宸鑒敢言知止誠以乞身陛下亭毒之恩不遺微細載

紆詔旨尚列師賓全度終始於臣爲厚跼天踏地空荷  
生成無任感戴欣懼之至謹奉表陳謝以聞貞元十年  
九月七日

賈相公陳乞表

臣某言臣以庸愚謬尸寵祿位居師長職重台司徒叨  
渥恩無補時化跼踏荏苒六年於茲去秋已來多病相  
繼每自策勉以奉休明而筋骸內衰官謗外積近染痢  
疾綿歷旬時進退之狀不恒寢食之理皆耗伏枕循省  
無所克堪凡在常情皆願貴仕况臣累蒙任使實越等  
夷從容朝堂沐浴天澤恩私歲久誠每切於匪躬疲勞

日侵事有迫於量力伏惟陛下覆育臨照曲成不遺俯  
矜愚衷移授散秩則樞軸不曠輪轅適宜拳拳之誠所  
望斯足無任懇歛惶懼之至謹奉表陳請以聞貞元十  
四年七月二十二日

鄭相公讓中書侍郎平章事表

臣某言伏奉今日恩制授臣中書侍郎同中書門下平  
章事詔書自天受命惶悸俯伏循省不知所容中謝臣  
聞宰理中樞從古所重貞教化之本導陰陽之和外撫  
四夷內循百職或乖於是則謂曠官臣志在服儒才非  
經遠爰自筮仕期於代畊而遭時踰量踐厯朝序自奉



禁中之職累叨望外之恩超貳冬官兼司選部流品未  
序銓綜乖方以榮爲憂伏待譴責豈謂特延眷渥叅列  
廟謀以瓶筭之資當柱石之重况臣自去夏尚守臺郎  
周月之間遂懸相印承陛下勵精之理副陛下則哲之  
明量力省躬必知不可伏乞俯廻詔命別選公才敢瀝  
血誠上黷天鑒無任惶懼懇迫之至謹奉表陳讓以聞  
貞元十四年七月二十五日

崔相公謝門下侍郎表

臣某言審已無庸謬膺寵授昨所陳讓迫於懇誠與全  
至公豈敢外飾黃閣務重非才實難墨詔復臨捧讀增

懼臣聞惟君知臣任之以器惟臣事君量而後入生逢  
昌運自此可封之人職在台司難逃竊位之責三年待  
罪無補盛明再命逾涯轉速官謗天威咫尺愚慮屏營  
伏以令斷表章不敢累黷宸扆雖誓心畢命以竭微衷  
折足濡翼其如公議無任感恩惶懼之至謹奉表陳謝  
以聞貞元十四年七月二十七日

賈相公謝賜馬及銀器錦綵等表

臣某言今日中使某乙奉宣進止以臣所進關內隴右  
圖并錄十卷特賜馬一疋并銀瓶盤等若干事錦綵若  
千疋者承命抃舞震驚失圖伏以聖朝覆燾無私聲教

遠被雖夏書禹貢周制職方重譯所通未若今日臣以  
末學獲奉昌期嘗好地理之書頗知河湟之事明徵史  
事博考前聞夙夜以思歲時遂久紀諸文字續以丹青  
上塵聖聰庶備方志豈謂眷慈宏獎寵賚特深出珍華  
於內府下駟駿於天廡恩榮所及煥麗相輝循顧庸虛  
曲承蕃錫負乘匪服併切於今無任感恩荷戴之至謹  
奉表陳謝以聞貞元十四年九月五日

齊相公讓修國史表

臣某言臣去九日於延英對陛下勤求理本語及史官  
遂命崔損承旨令臣兼修國史臣省已無取受恩殊常

倉惶震驚未及陳露今日中使某乙奉宣進止授臣此  
職竊自思忖非所克堪感戴屏營不知所據伏以褒貶  
善否裁成義類直詞是繫徃哲攸難臣謬踐台司無補  
皇化每憂覆敗上負聰明豈足以再紆宸慈累添榮渥  
稽前古之彝訓明聖朝之法誠立言載筆豈易其人量  
力循涯自知不可又自貞元四年李泌後宰臣遂不兼  
此職蓋以論著慎重留於聖心自非時謂全才何以遠  
循故事用此內省以榮爲憂况君舉必書時同堯舜之  
理任人以器願無遷固之能所顛殊私特寢成命無任  
感恩惶懼之至

云云

貞元十八年五月十八日

齊賓客相公進所賜馬表

臣某言臣頃待罪中樞特蒙眷渥旣切維鵜之刺又叨  
錫馬之榮憂在忝曠積成疾瘵聖慈全貸尚列師賓見  
驚福過之灾猶積喜中之懼况茲天驥輟自御閑寔有  
代勞之功且期致遠之用特優賜與以寵宰司臣自改  
官卽合進納而心力衰耗晦明纏綿筋骸自便惟在牀  
衽視聽所知不過湯藥沉痾餘息有異常人平居故事  
皆所廢忘頃年愧懼已切於負乘今日稽留自疑於奪  
魄因緣尸素積累罪辜踈愚昧脊隕越無地謹隨表奉  
進無任惶恐震懼之至臣某頓首謹言貞元十九年閏

二月二十三日

賈相公陳乞表

臣孰言伏奉今日制條除臣檢校司空兼左僕射依前  
同中書門下平章事祇荷成命奉戴恩私心魂震驚慙  
怖失次臣以庸薄無他才能先朝過聽謬賜駟策叨居  
鼎鼐十有三年猥承雨露之恩終闕涓埃之效累經陳  
乞未允懇誠復以餘年再承休命自陛下纂膺寶祚澤  
被羣生亨育所加飛沈遂性而臣齒髮頽暮疾恙嬰侵  
筋骸日衰心力皆耗况宰相之職用調陰陽司空之官  
實平水土從古授受重難其人以臣平居知猶不可今

中卽眩耄外亦支離寢興不安言語失次豈可苟貪貴仕  
上玷清時省躬則然况在公議古者君有致政之惠臣  
感得謝之恩鐘鳴漏盡前哲所誠年衰疾劇在臣爲甚  
迫於情理敢黷天威悽悽血誠期在鑒聽無任懇欵恐  
懼之至謹奉表陳讓以聞臣耽誠惶誠恐頓首頓首謹言  
貞元二十一年三月二十一日

第二表

臣耽言臣以疾病所迫氣力不任輒露懇誠上祈退免  
聖慈備至私願未從詔旨便蕃慰勉纖悉自宜策勵以  
奉休明螻蟻之誠敢忘夙夜犬馬之疾日益纏綿視聽

昏煩舉措乖誤心不記事口不逮心神理害盈正謂今日昔韋賢致仕著在漢庭韓厥請老書於魯史豈可以茲沉廢苟汚班榮迫於公私非敢撝挹自聖明馭宇動植覃恩豈於庸愚獨阻誠志乞迴天鑒俯遂殘生伏紙上陳感涕嗚咽無任惶懼懇切之至謹再奉表陳乞以聞臣耽誠惶誠恐頓首頓首謹言貞元二十一年三月二十七日

第三表

臣耽言臣殘年沉瘵漸不支持再表上陳未蒙允許願茲朽質徒感鴻私而枕席纏綿形神消耗上台之任歲



月積深大病之期晦明難保自叨升論道扶疾拜恩爾  
來狀候日以羸頓災因福過足驗於今伏乞賜臣骸骨  
收臣印綬期於必遂不敢煩詞無任量力懇迫之至謹  
奉表陳乞以聞貞元二十一年五月二十日

第四表

臣孰言臣聞生人所欲豈過富貴仕進之榮無踰公相  
臣受祿過厚叨恩過深疾瘵所侵日日以甚表章三上  
宸睠未迴繭然私室溘盡是慮臣頃歲齒及懸車疾經  
百日輒援禮令乞遂休閑先聖優容未遂矜允今則桑  
榆轉迫沉頓寢深比於往年遠不相及前後陳請備竭

肺肝特希聖慈俯鑒愚懇羸骸假息所望退身瀝血披  
誠伏待明命無任屏營懇迫之至謹奉表陳乞以聞貞  
元二十一年七月二十日

第五表

臣某言臣以庸愚累叨爵命大行皇帝拔擢非次列於  
宰司歲時寢深塵露無補太上皇踐祚聽政寵登三公  
而臣寢疾所嬰已在牀枕沉痾日劇氣力漸微自春涉  
秋四表陳乞伏遇陛下繼明纂統臨照萬方澄清化源  
朝野相慶但臣百疾所奏四支不任豈使將盡之人猶  
處具瞻之地私誠所迫上黷宸嚴旣非飾讓期在聽納

無任懇悃迫切之至謹奉表陳乞以聞永貞元年八月  
八日

第六表

臣某臣言犬馬之疾福過災生前日已來轉就危困自  
量氣力的不支持自陛下嗣纂睿圖臣已寢瘵綿亟竟  
不得一趨雲陛上謁龍顏幽壤之中以此爲恨臣備位  
宰相歲時最深永歸泉下無補明代伏惟陛下爲萬姓  
自愛則幽明蒙福無任感恩哀戀之至謹奉遺表以聞  
永貞元年十月一日

權載之文集卷第四十三

化國書館

athwa library

權載之文集卷第四十四

唐權德輿字載之

表

中書門下賀雲南軍破吐蕃劍山保定城表

臣某等言伏見劍南西川節度使某官某所奏兵馬使  
宋昊前月十八日與雲南軍合勢攻破吐蕃劍山保定  
城當日斬城使者伏以聲教所被遐邇大同蠶茲西戎  
尚有遺類或犯亭鄣且稽靈誅陛下睿算無窮天威遠  
震以夷裔感恩之衆佐藩隅制勝之臣取以多方累獻  
戎捷事皆前定必稟聖謨斬將搴旗出於料外堅城便

地盡落穀中通荒服會朝之途絕餘孽窺覲之際奉威  
懷之命以律而臧兼夷夏之師在和而克此皆陛下神  
武潛運妖氛永清由是成擒自當盡敵臣等謬當樞近  
媿乏廟謀幸覩成功不勝大慶無任欣抃之至謹奉表  
陳賀以聞貞元十年十二月三日

中書門下賀元誼李文通出洛城城表

臣某等言臣等今日面奉進止元誼李文通等蒙恩宥  
過以今月七日將領將士出洛州城者伏惟皇帝陛下  
聖神之化懷保元元仁洽好生感深格物誼等列於守  
將本以忠勞師旅之間失於慮始蒼黃之際自謂匪人

士吏危疑謀猷回適陛下以震耀所及殺傷則多曲成  
以誘其衷持久以通其變愀然軫念不忍致誅待以初  
心許之遷善指期開壁率衆來朝實賴亭毒之恩再全  
臣子之節宥茲一眚昭示萬方眷慈所宏動植知幸臣  
等虛薄備位臺司愧無調鼎之能獲覩止戈之慶無任  
欣抃踴躍之至謹奉表陳賀以聞貞元十二年正月十  
三日

中書門下賀汴州擒送李迺表

臣某等言中使某乙奉宣進止汴州以今日三日擒送  
李迺軍州並已寧帖者伏以聖德含宏在宥天下而匪

人醜類自抵刑章李迺本以庸微謬從軍校潛懷狂戾  
輒擾師徒乘其疾病坐邀職秩怙亂以逞志專戮以作  
威人思納忠義不同惡俄就械繫一方晏然雖鳧獍之  
心暫求假息而鷹鷂之逐曾不崇朝衆情交欣以待朝  
旨一昨陛下命將相之衆撫綏是邦明書罪人且示輕  
典成命方下浚郊以清聖謨炳然若合符契足使義士  
勵節貪夫革心稟化畏威無有遠邇臣等謬居臺鉉每  
奉德音媿乏嘉猷以承眷略無任歡抃慶幸之至謹奉  
表陳賀以聞貞元十二年七月九日

中書門下賀靈武大破吐蕃表



臣某等言臣等今日面奉德音靈武大破吐蕃擒生斬  
將者伏以眷謀武經陰隲上略兵符所授公戰多方蠶  
茲犬羊尚勞燿燧羣師稟命中權戒嚴犄角相因初設  
險於三覆竒正合發俄獻功於九擒數酋渠之首級積  
戎械於亭候勝氣餘勇鼓行無前卽叙可期有征斯在  
臣等謬居樞掖莫効涓埃每承以律之貞空荷止戈之  
運無任慶快踴躍之至謹奉表申賀以聞貞元十四年  
十一月二十九日

中書門下賀蔡州營招討使破賊表

臣某等言伏奉宣示蔡州行營招討使韓全義所奏去

四月二十七日於逆賊吳少誠界破賊驛子及馬步軍  
三千餘人賊弟吳少陽棄衆奔遁者伏惟陛下聖神廣  
運丕冒萬方而顛越匪彝自蹈鋒刃德音累降曉告不  
悛禁暴安人酌於軍志命師授律發於宸心整旅有嚴  
拊循決勝據便地以三覆分銳師而九攻材官突騎奮  
勵精勇啟行所及莫敢枝梧奔北之徒自相蹈藉威謀  
克壯殺獲斯多更候便宜續圖攻取蒙輪超乘靡不賈  
餘長轂鈎援期於盡殪此皆睿算前定純臣協心佇清  
淮瀆以慶天下臣等謬居樞近喜萬恒情無任忻抃踴  
躍之至謹奉表陳賀以聞貞元十六年五月四日

中書門下賀雪表

臣某等言臣聞王者法天布令有以感通則元氣調和  
庶徵時若按汜勝之書云雪者五穀之精伏惟皇帝陛  
下以人爲心以歲爲瑞故月當大呂節近嘉平信宿之  
間盈尺可驗光連萬頃已奪皓鶴之鮮慶在千箱更徵  
田峻之喜臣等謬居樞近獲覩休祥無任喜抃踴躍之  
至謹奉表陳賀以聞貞元十二年十二月九日

中書門下賀雨表

臣某等言臣聞王者以誠愛人以德動天則交感不違  
庶徵時序頃自春澤愆候上軫皇情協用五紀憂勤六

事暨純陽之節零禱是脩齋心勞慮恤隱宥過雲觸石  
而興潤月離畢以呈祥南畝就功西成可望含舖鼓腹  
幼艾相歡見聖人之化育符上帝之陰隲臣等忝列台  
司喜萬常品無任慶抃踴躍之至謹奉表陳賀以聞貞  
元十三年四月十一日

中書門下賀雨表

臣某等言百穀所仰甘雨是資三務成功望歲斯切雖  
閏候頗晚農畊未遲而時澤小愆皇情所軫齋禱上感  
陰陽以和遽興有渰之淒方茂如茨之稼况霖霖未已  
公私必均叶聖造之休徵副元功之育物臣等謬居樞

近喜萬常情無任欣賀抃躍之至謹奉表陳賀以聞臣  
某等誠惶誠恐頓首頓首謹言貞元十四年四月十七  
日

中書門下謝雨雪量放朝參表

臣某等言伏奉今日進止卿等朝列是常或陰雨不聞  
鼓聲則不免犇波走馬忽有墜損深軫朕懷自今已後  
縱鼓聲差池亦不得走馬并時暑稍甚及雨雪泥濘亦  
量放朝參者伏以夙興趨朝辨色就列臣下之制則惟  
其常陛下特降殊私上煩深慮當宵衣之際念陳力之  
臣或恐聲鼓差池登車犇迫且憂暑雨遂及祁寒俯或

欽定四庫全書  
卷四  
五  
馳驅時寬朝請曲成周於萬物厚澤浹於四時恩出非  
常事超前載臣等謬居樞近首奉德音無任忻忭感戴  
之至謹奉表陳謝以聞貞元十三年六月十二日

中書門下賀聖躬減膳降雨表

臣某等言臣聞王者祇若天心勤恤人隱必有交感之  
速以叶順成之祥頃自春及夏時雨尚少稼事所切皇  
情載勤分命官師虔修祠禱而又齋誠減膳感達上元  
以蒸人望歲之心爲陛下納隍之慮兼軫幽繫議寬狃  
牢意纔發於穆清月已離於星畢霈然周洽曾不崇朝  
靡失長贏之期方興多稼之咏茂遂生植統和陰陽歡

康之誠音挾遐邇臣等叅居近列獲奉昌時無任欣抃  
踴躍之至謹奉表陳賀以聞臣某等誠惶誠恐頓首頓  
首謹言貞元十五年五月十九日

中書門下賀德音減放夏麥并賑給表

臣某等言伏奉今日制奉先等五縣夏麥除得水利外  
損者並放長安等一十八縣更審巡覆聞奏卽有進止  
仍委有司計會賑給者伏惟陛下愛人之心與天合德  
憂勤亭育務盡其宜頃者春澤愆期夏麥非稔若保赤  
子軫於皇情降損寢食虔恭齋禱一時不雨已深求瘼  
之恩一穀未登則下責躬之詔蠲其南畝之稅賑以太

倉之儲德音霈然動植相賀慘怛之愛纖悉無遺申戒  
官司宣明聖澤歡聲發於轂下嘉氣周於域中凡在生  
靈孰不鼓舞臣等謬居近列首奉鴻私旣乖變理之能  
倍切負乘之愆無任捧戴慶抃之至謹奉表陳賀以聞  
貞元十四年六月二十七日

中書門下賀八陵修復畢表

臣某等言臣聞宗廟之享以致吉蠲山園之制以極嚴  
敬國朝祀典參用漢法寢宮便殿虔奉衣冠日往月來  
久未修復伏惟皇帝陛下繼明恭已大孝因心丕承祖  
宗對越天地薦馨香於九廟崇經構於八陵庶工子來



百堵皆作人神協吉龜筮告猶用成奕奕之新實自烝  
烝之孝行宮盡復神御以安掌禮之官虔於受命奉陵  
之縣但覩成功慮財用而不賦於人量事期而不愆於  
素罔極之感交於神明奚斯閔宮徒頌諸侯之事叔孫  
原廟蓋匪先王之法孝彰禮備豈比於今列聖在大萬  
方受祉春秋匪懈超冠百王臣等謬忝台司獲承詔旨  
無任誠賀之至貞元十四年八月十七日

中書門下賀雪表 二首

臣某等言臣聞王者布令以時應天以實惟茲瑞雪用  
兆豐年伏惟陛下齋誠念人振廩恤隱同雲斯應宿麥

可期以五穀播植之精驗於農志當一陽發生之候助  
此休徵通感不違朝野相賀臣等謬居近侍獲奉昌期  
無任欣抃踴躍之至謹奉狀陳賀以聞臣某等誠歡誠  
喜頓首頓首謹言貞元十四年十一月十日

中書門下賀雪表

臣某等言臣聞天道下濟聖心上感以是訢合發爲休  
徵惟茲雨雪之祥必稽時令之順伏惟皇帝陛下憂勞  
庶政勤憫蒸人鑒寐之間不忘於念慮賑恤之使相繼  
於道途膚寸興雲盈尺呈瑞以來麤之積潤爲嗣歲之  
順成如京如坻百嘉可望旣霑旣足率土同歡臣等忝

列侍臣倍恒忻賀無在慶抃踴躍之至謹奉表陳賀以  
聞臣某等誠歡誠喜頓首頓首謹言貞元十四年十一  
月二十二日

中書門下賀雨表

臣某等言臣聞聖人之德與天地合則庶徵時若生類  
昭蘇伏惟陛下慈愛元元統燭一作御萬物憂在稼穡切

於登成慮甘澤之愆期憫蒸人之望歲誠之所感天且  
不違有滄而興睹一夕之霑洽大田相慶知百穀之阜  
蕃農夫克敏秀者皆寔篋筮就緒倉箱可期遠邇幼艾  
忻歡鼓舞臣等謬當近侍喜萬常情無任喜抃踴躍之

林華之文集卷四  
至謹奉表陳賀以聞臣某等誠惶誠恐頓首頓首謹言  
貞元十四年十一月十日

中書門下賀興慶池白鸕鷀表

臣某等言伏承陛下以去九日幸興慶池龍堂爲人祈  
雨忽有一白鸕鷀見於池上衆鸕鷀羅列前後如引御  
舟明日之夕澍雨遂降者伏惟陛下子惠元元躬勤庶  
政念切時澤虔於禱祈以陛下如傷之誠上感元貺在  
列祖發祥之地下降靈禽潔白異姿翮飛成列若溟天  
意以承宸衷簇一作族陰雲於一夕洒霈澤於千里疾均  
影響慶浹公私昔周致白翟徒稱遐遠漢歌赤鴈亦薦

郊廟豈比今日感於至誠瑞牒所無蒸人何幸伏惟宣  
付史冊昭示將來臣等備位鼎司倍百歡賀無任欣慶  
并躍之至謹奉表陳賀以聞貞元十三年四月十二日

中書門下賀滑州黃河清表

臣某等言今日內侍朱希顏奉宣進止示臣鄭滑觀察  
使姚南仲所奏今月一日至六日白馬縣界三十里黃  
河清者伏以導自積石出於崑崙乃建靈源之封特視  
上公之禮克符昌運必降殊祥伏惟陛下聖澤感通休  
禎一作徵疊委惟此濁質化爲清瀾國典所書是稱大瑞  
詩曰俟河之清人壽幾何歎其不可得而見也今則白

馬之津三十里所澄澈如練淪漪成文一邦幼艾共觀  
嘉應萬寓經界式彰永寧昔秦號水德徒推厭勝漢紀  
河平苟安決溢神功幽贊獨表清時足以薦諸宗廟書  
之史策臣等謬登樞近獲奉休明無任欣抃踴躍之至  
謹奉表陳賀以聞臣某等誠歡誠喜頓首頓首謹言貞  
元十四年閏五月十五日

中書門下賀河陽獲白兔表

臣某等言今日中使楊明義奉宣進止示臣河陽三城  
節度使李元淳所奏今月六日於河陽縣城南社壇獲  
白兔者謹案孫氏瑞應圖曰王者加恩耆老則白兔見

又前史所稱多自純孝所感伏惟皇帝陛下誠合天地  
孝通神明元符嘉祉遠近相屬惟此瑞獸是稱月精來  
應昌期皓然雪彩當盟津之壘俯句龍之壇郊畿士吏  
駭視歡賀且自前歲已來中外所列凡在羽毛之族多  
呈皎潔之祥今八陵園寢脩復斯畢萬國臣寮手足相  
慶盛儀旣展靈貺斯臻幽贊素姿若合符契臣等謬居  
台鼎倍萬常情無任慶抃之至伏請宣付史館謹奉表  
陳賀以聞貞元十四年八月二十二日

中書門下賀醴泉獲白鹿表

臣某等言今日中使某乙至奉宣進止示臣等醴泉縣

鎮遏使康志寧於建陵柏城外得一白鹿者謹按孝經  
援神契曰王者德至禽獸則白鹿見又孫氏瑞應圖曰  
王者惠及下民則至伏惟皇帝陛下聖德廣運與天合  
符尊祖敬宗愛人育物含靈効祉叶贊休明惟此仁獸  
式彰孝理皎然玉質俯近軒臺獨麇麇以不羣亦呦呦  
而遂性漢得之於槐里齊獲之於敏正呈祥瑞聖豈比  
今日臣等謬列台司無補時化每承靈貺徒竭歡心無  
任慶抃踴躍之至伏請宣付史館謹奉表陳賀以聞貞  
元十四年九月十九日

中書門下賀邢州獲白雀白山鵲等表



臣某等言今日伏奉宣示昭義軍節度使李元淳所進  
於邢州獲白雀白山鵲各一者謹按孫氏瑞應圖曰王  
者奉已儉約尊事耆老則白雀見又晉中興書曰天下  
安寧則見伏惟陛下純儉成化乾坤合符敬彼黃髮感  
茲霜毳俗旣登於壽域事多驗於祥經用應昌期固無  
虛月昔神雀効祉乾鵲知來或用以紀年或聞諸徃載  
豈此山禽叶質靈貺特殊皎潔異姿追飛交映休嘉所  
集遐邇同歡臣等忝列台司倍百忻賀無任喜慶踴躍  
之至謹奉表陳賀以聞

中書門下賀恒州華州嘉禾合穗表

臣某等言伏見武俊所奏恒州鼓城縣生嘉禾一本合穗又盧徵奏華州鄭縣太平鄉三交里獲嘉禾一穗者謹按孫氏瑞應圖曰嘉禾者五穀之長王者德茂則生伏惟陛下德叶元功仁育生類同穎擢秀殊祥並時昔周道旣昌唐叔以獻表天下和平之兆爲陰陽訢合之符今五穀登成百嘉儲祉發於厚載集是休徵况嶽鎮之方表章繼至感通昭晰莫甚於斯臣等忝列台司喜倍常品無任欣抃踴躍之至謹奉表陳賀以聞臣某等誠歡誠喜頓首頓首謹言貞元十五年九月七日

中書門下賀許州連理棠樹表

臣某等言今日中使某乙奉宣進止示臣等陳許州觀察使上官浣所奏許州長社縣嘉禾鄉合穗村連理棠樹一株者謹按孝經援神契曰王者德及草木則木連理伏惟陛下聖澤元功浹洽生類故天休滋至地產交感亭育變化發於百祥珍木敷榮異根合幹表慈植物以瑞康時况嘉禾各地已同唐叔之獻甘棠挺秀寧比召南之什芬芳連理遐邇叶心藁滋慶祉昭煥圖籍臣等謬忝鼎飴喜萬常情無任欣抃踴躍之至謹奉表陳賀以聞貞元十八年四月一日

中書門下賀元和殿甘露降表

臣某等言今日中使某乙奉宣連止示臣等元和殿甘露降於桐樹丁香樹者謹按孝經援神契曰王者德至天則甘露降孫氏瑞應圖曰王者和氣茂則降於草木伏惟降下聖德感通殊祥允集當長羸之月下順人心降穆清之中上昭天意太和陰騰雲液潛滋屑玉綴珠團枝泣葉質同雪白味若飴甘瀝珍木以相鮮激繁香而合發雖軒工頌瑞漢史紀年徒習前聞豈如目覩此皆協氣旁達一作至天休合符凡在懷生不勝大慶等謬居樞近倍萬歡誠無任欣抃踴躍之至謹奉表陳賀以聞貞元十八年五月十八日

中書門下賀神龍寺渠中瑞蓮花表

臣某等言今日中使某乙奉宣進止示臣等神龍寺殿前渠中瑞蓮花圖其花一莖兩房者伏惟陛下仁聖感通宏被生植宥萬方之暇必順天心於九重之中別開佛刹細縕降祉菡萏敷榮瑞茲灼灼之花迥出田田之葉吉祥殿外芬馥殊常功德池中光華交映扶疎發越並秀相鮮元功嘉應超貫圖謀彼芝稱三秀麥有兩岐雖驗休祥豈階妙法覩雙房之挺茂荷一雨之均霑陰隲生成發揮嚴淨臣等忝居樞近倍萬歡心無任欣抃悅懌之至謹奉表陳賀以聞貞元十八年六月八日

權載之文集卷第四十四

上海圖書館  
shanghai library

權載之文集卷第四十五

唐權德輿字載之

表狀

中書門下謝御製九月十八日賜百官追賞因  
示所懷詩狀

右中使楊光瑤至奉宣恩旨賜臣等前件詩者睿詞炳  
煥降自九霄天澤昭臨榮加百辟旣晞湛露又沐卿雲  
感今日之和聲助林塘之霽色况錫宴之際極其寵光  
求理之深播其雅頌樂以發德文以化成由其歡心盡  
躋壽域跪捧三復備見皇慈臣忝跡樞密親承聖渥無

任感恩抃躍之至謹奉狀以聞貞元十年九月十八日

中書門下進奉和御製九月十八日賜百官賞

因示所懷詩狀

右比年以三令節賜百僚宴賞昨者時及重九陰雲未  
收特延聖慈又改良日中宴之際俯降睿詞猶元氣之  
涵煦比慶霄之紛郁裁有六義昭示萬方湛恩自天具  
物知感况陛下以誠信施教以慈愛緣情形於詠歌繫  
在風化伏以唱和之重合綴庸音而動植之微何酬元  
造臣等忝居樞近首沐鴻私竊抃率舞不能自抑謹獻  
奉和聖製詩一首詞理鄙淺輕冒宸嚴無任感恩喜躍



之至謹詣延英門隨狀封進以聞貞元十年九月二十四日

中書門下謝御製九日言懷賜中書門下及百寮詩狀

右中使王敬親至奉宣恩旨賜臣等前件詩者伏以聖人之言律度天下特降睿藻發於深誠極三代之質文致萬方於仁壽時當令節慶屬豐年同在鎬之和樂異橫汾之靡曼臣等謬居樞近每沐鴻私空瞻日月之光難酬雨露之施無任感恩抃躍之至謹奉狀陳謝以聞貞元十一年九月九日

中書門下奉和聖製九日言懷詩賜中書門下  
及百官詩進狀

右今月九日中使王敬親至奉宣恩旨賜臣等前件詩  
者日月麗天萬物皆覩韶咸度曲八音克諧伏惟陛下  
有堯之文思舜之恭已每睿詞下降皆以人爲心故宴  
樂以示慈惠詠歌以昭教化歡令節慶有年順時賦政  
之祥也敦九族安萬邦自中發外之澤也然後以太平  
之化躬行於今知之非難是謂至德豈比夫漢武魏文  
屬詞類事而已臣等叨居近侍首沐湛恩空仰昭回難  
酬覆露謹各獻奉和聖製詩一首輒以蕪鄙上黷宸聰

庶達封人之心敢比賡歌之義無任感恩戰懼之至謹  
詣延英門隨狀封進以聞貞元十一年九月十五日

中書門下謝御製重陽日中外同歡以詩言懷  
因示羣官一首

右中使劉希昂至奉宣進止賜臣等上件詩者伏以陛  
下順用二儀曲成萬物王道正直天文昭回因令節以  
宴樂發睿慈於歌詠煥然麗藻丕變時風慶屬有秋化  
覃無外凡百臣庶一其歡心臣等忝居台司首承渥澤  
無任感戴欣躍之至謹奉狀陳謝以聞貞元十三年九  
月九日

中書門下進奉和聖製重陽日中外同歡以詩  
言志因示羣官狀

右今月九日中使劉希昂至奉宣進止賜臣等前件詩  
者臣聞惟天聰明惟聖時憲故三辰爲章六義成文伏  
惟陛下端拱穆清慮必周於皇極錫宴重九恩每覃於  
百寮煥發睿詞化成天下書於右史實邁前王臣等才  
異賡歌職叨近侍在宥之化皆獲可封聞韶之時忽焉  
竊抃謹各獻奉和聖製詩一首輒以荒鄙輕黷天威無  
任感恩戰慙之至謹詣延英門隨狀封進以聞貞元十  
三年九月十六日

中書門下賀新製中和樂狀

右中書門下奏今月七日伏蒙聖恩賜臣麟德殿宴會  
觀上件新樂臣聞先王作樂必本人情所以崇德所以  
辨政伏惟陛下以大中設教以大和育物肇創嘉節於  
今十年年皆順成俗以仁壽今則睿謀廣運度曲惟新  
三才位序邁韶咸之美八卦成象見天地之心制氏未  
覩其鏗鏘伶官甫披其行綴聲歌所感遐邇同歡臣等  
職忝台司時逢交泰昨已面有奏陳請付有司頒示四  
方永光樂府仍請編入史冊伏望天恩允臣所奏貞元  
十四年二月十二日

中書門下進奉和聖製中春麟德殿會百寮觀  
新樂詩狀

右今月七日伏奉聖恩賜百寮麟德殿宴會羣臣觀新  
樂并賜臣等聖製詩序者伏惟陛下法天授人順時布  
政中和制樂以叶六律之音元首作歌以廣百工之業  
感於順氣諧此正聲春臺煦然生物資始洽慈惠於臣  
庶播易良於國風照燭乾坤輝動金石臣等獲叨近侍  
曲被湛恩旣在藻以遂性亦聞韶而忘味敢附典謨之  
末顧慙賡載之詞謹各獻奉和聖製詩一首謹詣延英  
門隨狀封進以聞貞元十四年二月十三日

勅批

朕思以中和被於風俗既傳令節載序樂章因會羣寮  
用申歡宴斐然成韻有媿非工卿等各抒清詞咸推藻  
麗再三省覽良用嘉焉所獻知

中書門下謝御製中和節賜百官宴集因示所  
懷詩狀

右今日中使薛盈珍至奉宣進止賜臣等前件詩者臣  
聞天以雲漢爲章昭回於上人以文義爲紀化成以下  
伏惟陛下勤慮理本合於中和月當中春日乃初吉特  
降藻思助其發生由勾萌以至於暢茂推誠信以均其

化育捧戴殊觀如登春臺慶霄天籟耳目清越凡在百  
辟一其歡心臣等謬列台司首承慈渥無任慶抃踴躍  
之至謹附狀陳賀以聞謹狀貞元十七年二月一日

中書門下進奉和聖製中和節賜百官宴集因

示所懷詩狀

右今月一日中使薛盈珍至曲江會所奉宣恩旨賜臣  
等前件詩者上齊二曜旁合八音闡文教於休明叶昌  
期於亭育况茲令節克順人心延仲月以違晦撰良辰  
而得一亦既逾紀必聞有年生植阜蕃休嘉交感而又  
言志以導口作樂以同和示湛恩於宏覆俾庶類於咸



若臣等職叨近侍仰戴元功華封祝堯徒有其志虞臣  
歌舜豈易其才謹各獻奉和聖製詩一首輒奏庸音上  
塵聰聽無任感恩喜慰之至謹奉狀陳奏以聞貞元十  
七年二月九日

中書門下謝聖製重陽日卽事六韻詩狀

右中使劉希昂至奉宣進止賜臣等重陽日詩并賜茶  
酒音樂令臣等樂飲者伏惟陛下以睿聖之姿廣文明  
之運每因嘉節必布鴻私錫宴同和凝旒振藻八音合  
發六義相宣降於雲霄粲若神象然後宴樂慈惠霈然  
寵光衢酒薰絃承九天之慶賜秋光霽景見百穀之順

成合德不違寔若符節小大臣庶鼓舞相歡臣等忝列  
台司倍萬欣賀無任喜抃踴躍之至謹奉狀陳謝以聞  
貞元十七年九月九日

中書門下進奉和聖製重陽日卽事六韻詩狀  
右今月九日高品劉希昂至曲江宴會所奉宣進止賜  
臣等前件詩者伏惟陛下覆露亭毒以人爲心文明法  
象與天地準緣聖情以稽四炤酌時令以休百工法言  
麗藻盈耳溢目臣聞日之出也照先及於扶桑雲之興  
也潤亦應於柱礎臣等旣叨近侍首沐鴻私輒罄庸音  
以申攀和蹄涔越海誠亦無因塲藿向陽猶思自効謹

各獻奉和一首輕黷宸嚴心神戰越無任惶怖悚慄之  
至謹奉狀陳奏以聞貞元十七年九月十九日

中書門下賀建康郡王雙誕皇曾孫狀

右今日伏見中使朱希顏云建康郡王雙誕皇曾孫者  
伏以聖慈馭物有亭育之仁故上天陰隲降蕃衍之祉  
協本支百世之義見曾孫雙誕之祥克禋克祀每勞於  
前古無灾無害方盛於今日熊羆並夢棠棣連芳遠同  
華封之祝更鄙商瞿之歎斯實莫大之慶用表無疆之  
休所以永固皇家增耀磐石臣等忝居近列倍萬歡心  
無任抃躍之至謹奉狀陳賀以聞貞元十年十二月十

五日

中書門下賀南詔異牟尋授冊禮畢表

右今日中使某乙奉宣進止得劍南西川節度使某乙  
奏得冊南詔副使寵頌狀云異牟尋以十月二十七日  
受冊禮畢迎候祇應皆竭深誠又冊命之時天宇清朗  
者伏以聖澤所覃殊方卽叙奉使臣之禮遠稟綏懷當  
錫命之時盡其誠敬變西南陰晦之候感天地休嘉之  
祥此皆睿渥遐宣上元降祉永寧萬寓守在四夷臣等  
忝備台司不勝大慶謹奉狀陳賀以聞貞元十年十二  
月二十一日

中書門下賀幽州盧龍軍節度使檢校尚書右  
僕射劉濟去四月十七日於室韋川等三處大  
破奚虜六萬餘衆狀

右今日中使某乙至奉宣恩命示臣等前件破賊露布  
者伏以王澤所覃裔夷率化蠢茲小醜敢負深恩時懷  
向背之心或作方隅之梗守臣宣力師律戒嚴隨其嘯  
聚必就擒剪阨害之地分設三軍首級之數動逾萬計  
此皆睿謀陰騭武旅成功臣等忝備台司累覩戎捷無  
任慶幸之至謹奉狀陳賀以聞貞元十一年五月七日

中書門下賀降誕日麟德殿三教論議狀

右三教源流久無錯綜或使後學泥於通途陛下遂萬  
物之宜御六氣之辨徵緇黃之侶振元古之風精義入  
神微言盡性然後稽合同異討論指歸以元元之慈儉  
宏於在宥以釋氏之定惠納諸誠明用濟斯人共陶鴻  
化足以光策書於東觀資聖壽於南山臣等備位台庭  
仰承至論無任慶抃欣躍之至謹奉狀陳賀以聞貞元  
十三年四月二十一日

中書門下奉韋臯奏南詔奉聖樂章狀

右中書門下奏中使楊明義奉宣韋臯所奏南詔奉聖  
樂章嘉其遠誠昨已閱試卿宜知悉者伏聞樂以導志

感而成聲故有翕純皦繹之音韎任禁昧之奏以節百事以平八風伏惟陛下覆露法天和澤柔遠順氣旁達殊方洽歡願爲保障以稟聲朔納邸獻樂贊揚時休制氏新其曲度吾人協其辭禮雖渝舞可翫夷歌成章兩漢所書未若今日伏望宣付有司編諸史冊貞元十六年正月二十八日奉勅宜付所司

中書門下賀劍南西川節度使去八月十八日於雍州靈關路大破蕃寇拔木破城并破通鶴軍天寶城應擒生斬級焚燒倉庫樓閣收獲羊馬器械等狀

右今日中使某乙奉宣恩旨示臣等韋某奏表大破吐蕃擒生斬級者戎醜負恩乘秋竊發敢擾邊鄙自干誅夷伏以睿略無方守臣授律龔行決勝之策分遣賈勇之神面縛首級風馳電掃屠堡柵而平其險阨焚倉廩而盡其糗糧南路靈關旣無遺類西郊朔塞可以成擒神武指蹤四方宣力奇功吉語相繼上聞耀天威而盡殪昭文德以卽敘止戈之慶計日可期臣等備位台司倍百歡賀無任慶忭悅懌之至謹奉狀陳賀以聞貞元十七年九月十二日

權載之文集卷第四十五



權載之文集卷第四十六

唐權德輿字載之

表狀

恩賜馬一疋并鞍轡及告身衣兩副等

右今日中使景忠信至伏奉恩旨賜臣前件馬并鞍轡  
告身衣服等寵賚所及遑荷難勝臣自受命已來神爽  
飛越晦明之際寢食靡遑恩私特加榮錫備至命書煥  
輝渥澤殊常出衣服於御府輟華駟於天廐負乘之懼  
不稱之災慶賜有溢目之榮獎任有提耳之誠以臣愚  
陋負荷難勝雖欲殺身豈酬鴻造無任感恩惶懇荷戴

之至謹奉狀陳謝以聞謹奏元和五年九月三十日

謝批荅表

臣德輿言昨日中使劉履謙至伏奉聖恩批荅令臣卽  
斷章表者臣以庸薄無他材能先朝駟策謬掌文誥因  
緣荏苒累踐班榮每自循省常憂顛覆至於經理代務  
非所克堪伏以陛下推擇宰司萬方觀聽謀猷化本宜  
得全才此臣所以尤不自安披瀝肝膽與狗由裏之請  
不傷則哲之明鴻私猥加愚懇靡遂雖盡忠極慮不敢  
愛身而孱滯顛蒙難逃其責伏讀詔命焚灼在懷誓心  
畢命難酬萬一無任感恩荷戴戰懼之至謹奉表陳謝

以聞臣德輿誠惶誠恐頓首頓首謹言元和五年十一月一日

謝權知門下省過官狀

某官臣權德輿

右臣奉恩命權知門下省過官者伏以過官至重事在黃樞閱郡吏之否臧布百職於中外苟或非當其傷實多臣自玷台司忽及半載一昨陳乞天睠未迴當憂惕之中而寵榮薦至摩頂至踵豈酬鴻私無任感恩荷戴之至謹奉狀陳謝以聞謹奏元和六年二月十五日

請祔廟狀

相書之五集 卷之二 二  
臣亡父先臣秘書省著作郎贈太子少傅某

右臣先臣在元宗廟筮仕河朔忠孝名節冠於當時至德  
乾元之間歷監察御史起居舍人著作郎在代宗廟早  
違聖代臣幼丁荼蓼不及義方過蒙渥恩祿秩崇厚按  
開元禮文合立私廟三室永懷怵惕思展吉蠲已於通  
濟坊修建擇用二月二日祔饗臣位忝台司時逢孝理  
事循彝典禮展私誠感戴恩榮不敢不奏聞伏聽勅旨  
元和七年正月二十五日

謝追贈表

臣德輿言伏奉今日恩制臣亡父贈太子少傅先臣某

追贈太子太保寵靈所及歲數特加奉承命書成後

追贈太子太保寵靈所及徽數特加捧承命書感奉酸  
咽臣誠惶誠荷頓首頓首伏以先臣在天寶末年筮仕  
幽朔艱貞特立忠孝兩全名節冠於今古風聲激乎天  
下以執憲載筆逮事肅宗稟命不融早違昭代臣齟齬  
之歲孤苦零丁遭逢昌運漸履名級過叨睿獎忽至台  
司無能受祿莫與臣比以先臣之名器未稱餘慶或鍾  
蒙陛下之寵秩逾涯此生何幸所建家廟實稽國章時  
及春祠禮從祔饗豈謂聖慈曲被孝思是崇當啟匱題  
主之時有告第漏泉之命感深霜露禮盛蒸嘗自菜流  
根實荷非常之澤摩頂至踵難酬不次之恩昭明交感

山嶽非重無任祗荷隕越之至謹奉表陳謝以聞臣某  
誠惶誠荷頓首頓首謹言元和七年二月一日

進詩狀

舊詩五十首

右宰臣奉宣進止令臣進舊詩者伏惟陛下以聖德文  
明化成天下徵詩之旨本在樞衡念舊之仁因及簪履  
臣頃尸重任久曠官常今列大僚猶叨寵渥於孔門非  
賜也言詩之目在漢庭異匡氏說詩之工徒積繁蕪豈  
近聲律自承休命伏用兢惶待罪之時無補公餽免退  
之後猶獻雕蟲旣乖法言有黷聰聽震悚怵惕不知所

安謹錄前件詩五十首奉進無任慚悃隕越之至謹奏  
元和八年六月十三日

謝借飛龍馬狀

蒙恩借飛龍馬三匹

右今月十日中使張少暉至長樂驛奉宣進止借臣前  
件馬送出府界者臣以庸薄謬叨恩私寵榮沓至感戴  
難處以今月十五日至東驛出京兆府界天闕儲胥仰  
瞻日遠御閑蹀躞假借恩深仰元澤以難酬顧微生而  
何幸况代勞比君子之德負乘積小人之憂感戀明庭  
涕泗橫集當君陳之寄必竭肺肝羨騶裊之迴恨無羽

翼無任感荷戀慕之至謹奉狀陳謝以聞謹奏元和八

年七月十日

留守謝上表

臣某言伏奉今月三日制命授臣檢校吏部尚書兼御史大夫充東都留守判東都尚書省事以今月二十四日至東都上訖榮渥特加寵光備至俯仰印綬慙慙交懷中謝臣才不出衆祿期代耕因緣文字進越名級自聖明臨馭特沐鴻私歷五曹之貳居九卿之長遂叨大任忽涉四年智慮孱愚言詞朴訥徒淹歲月莫展涓埃雖竭匪躬之誠竟乖陳力之効自免樞務猶忝春官纔



經半載復授今任前後所歷皆不因入無非睿獎以至  
崇大况居守所寄東夏式瞻在君陳畢公之選兼天官  
憲府之重面辭之日親奉聖謨式遏匪人整訓戎事用  
制竊發必資兼材豈臣懦薄所宜負荷今兵力至微武  
備不足此皆天鑒所察臣不敢累黷聰明杜其姦情亦  
在早計必異磨礪鈆鈍罄竭肝心忠以事君死而後已  
違離宸睠感戀闕庭以陛下注意之恩誓微臣捐軀之  
節無任荷戴屏營之至謹差押衙試殿中監成黨奉表  
以聞臣某誠惶誠恐頓首頓首謹言元和八年七月二

十四日

太常博士舉人自代狀

將仕郎守太常博士臣權德輿

准制舉自代官浙江東道義勝軍副使殿中侍御史內  
供奉賜緋魚袋陸叅

右伏准建中元年正月五日制常叅官上後三日舉一  
人以自代者前件官操履淳固識度清明學通典憲文  
稽雅頌損益儀制實當其才謹具名如前謹奏貞元八  
年正月十七日太常博士臣權德輿狀進

右補闕舉人自代狀

將仕郎守右補闕臣權德輿

准制舉自代官將仕郎守太常博士賜緋魚袋鄭僖  
右伏准建中元年正月五日制常叅官上後三日舉一人  
以自代者前件官文藝敏達行義貞循直道正詞確然  
有立使之司諫才實過臣謹具名如前謹錄奏聞謹奏  
貞元八年六月二十八日右補闕臣權德輿狀進

起居舍人舉人自代狀

徵事郎守起居舍人臣權德輿

准制舉自代官朝議郎行右補闕歸登

右伏准建中元年正月五日制常叅官上後三日舉一  
人以自代者前件官詞學精實晦而不耀操尚純素貞

而有恒司諫十年其道一貫凡所踐履臣頗諳知使之  
記言庶禪法教謹具名如前謹奏貞元十年五月一日  
起居舍人臣權德輿狀進

起居舍人舉人自代狀

徵事郎守起居舍人知制誥臣權德輿

准制舉自代官儒林郎守尚書膳部員外郎賜緋魚袋  
楊於陵

右伏准建中元年正月五日制常叅官上後三日舉人  
以自代者前件官識理精通文藝典實行潔而敏氣和  
而專施於政事動有成績察其素履堪列近臣宏奉訓

辭庶能稱職謹具名如前謹錄奏聞謹奏貞元十年八月二十四日起居舍人知制誥臣權德輿狀奏

宣德郎守尚書駕部員外郎知制誥雲騎尉臣權德輿准制舉自代官朝散郎使持節開州諸軍事守開州刺史賜緋魚袋唐次

右伏准建中元年正月五日制常叅官上後三日舉一人以自代者前件官文詞朗茂學識宏暢常任起居郎禮部員外郎出守四年日新其道司言草奏所任誠切酌於公議次有其才謹奏貞元十一年十一月二十四日駕部員外郎知制誥臣權德輿狀進

朝議郎守尚書司勳郎中知制誥雲騎尉賜緋魚袋臣  
權德輿准

制舉自代官朝議郎守尚書禮部郎中賜緋魚袋許孟  
容

右伏准建中元年正月五日制常叅官上後三日舉一  
人以自代者前件官有通識敏行強學懿文爲官擇人  
堪備清近發揮書命必有可觀謹具名如前謹錄奏聞  
謹奏貞元十四年四月四日司勳郎中知制誥臣權德  
輿狀進

朝議郎守中書舍人雲騎尉賜緋魚袋臣權德輿

准制舉自代官朝議郎守尚書司封郎中充集賢殿御  
書院學士判院事上騎都尉陳京

右伏准建中元年正月五日制常叅官上後三日舉一  
人以自代者前件官文學閎深資性貞實厯博士補闕  
三爲郎官該達古今議論堅正掖垣之任望實所歸使  
之司言必能稱職謹錄奏聞謹奏

朝議郎守尚書禮部侍郎雲騎尉賜緋魚袋臣權德輿  
准制舉自代官朝議郎守中書舍人驍騎尉賜緋魚袋  
權知吏部選事楊於陵

右伏准建中元年正月五日制常叅官上後三日舉一

人以自代者前件官文詞精雅器業端醇久踐職員多  
所練達求才誠重考藝尤難將辨妍媸必歸鑒裁使居  
其任尤允至公謹具名如前謹奏

朝議郎守尚書戶部侍郎雲騎尉賜緋魚袋臣權德輿  
准制舉自代官湖南郡任團練觀察處置等使朝請大  
夫檢校右散騎常侍使持節都督潭州諸軍事兼潭州  
刺史御史中丞賜紫金魚袋楊憑

右伏准建中元年正月五日制常叅官上後三日舉一  
人以自代者前件官文學政事侃然自立器宏道直材  
茂識精累居中外克著聲實稽其志業可處大官司徒



貳左右邦教以臣忝據恐紊彝章陟明而授庶允公望  
謹錄奏聞謹奏

朝議大夫守尚書兵部侍郎驍騎尉成紀縣開國伯臣  
權德輿

准制舉自代官太中大夫守尚書禮部侍郎上輕車都  
尉清河縣開國男崔邠

右伏准建中元年正月五日制常叅官上後三日舉一  
人以自代者前件官敏識全才焯見理本久司綸翰乃  
擢禮闈凡所典領克揚聲績伏以夏官之貳務切簡稽  
國朝以來望實皆重其於選任頗異他曹以臣居之玷

辱爲甚掄才以授敢獻所知謹錄奏聞謹奏

朝散大夫守尚書吏部侍郎驍騎尉成紀縣開國伯權  
德輿

准制舉自代官朝請大夫守尚書刑部侍郎騎都尉高  
陽縣開國子許孟容

右伏准建中元年正月五日制常叅官上後三日舉一  
人以自代者前件官有文學行義堅明中正早登郎吏  
謹貫法程項任給事中抗議不回德宗爲輟已行之詔  
自貳職司寇權領選曹強志在公克舉官業今銓衡務  
重朝選所難臣頃轉兵部纔經數月驟茲擢遷必速官

謗中臺之首尤在得人推於至公庶允羣議謹錄奏聞  
朝議大夫守太子賓客驍騎尉成紀縣開國伯臣權德  
輿

准制舉自代官諫議大夫韋况

右伏准建中元年正月五日制常叅官上後三日舉一  
人以自代者前件官含和抱素宴息道樞循性履方遠  
跡聲利徵拜諫列乞歸故山實有古風可司教本伏以  
賓護之任道德所宜不嬰事物時謂清重正職員於三  
品列商皓於四人豈臣小生忽據尊秩久於塵玷自速  
愆尤過蒙恩私猶處優禮俯仰慙灼上負聰明賦祿命

欽定四庫全書  
卷之三  
官必歸者碩以臣負罪非所克堪推賢讓能朝有恒制  
大僚厚德慶洽時情謹錄奏聞謹奏

朝議大天守尚書兵部侍郎上柱國開國伯臣權德輿  
准制舉自代官朝議大夫守右散騎常侍上柱國宏農  
郡開國公賜紫金魚袋楊憑

右伏准建中元年正月五日制常叅官上後三日舉官  
一人以自代者前件官曠度偉才明試直道卓爾山立  
不隨波流自踐朝倫時推公器話言形於風槩聲猷發  
於事業庶政根本在於南官臣以庸虛五贊六口口口  
望實未諧茲選物議時情共知不可輒量力以循分期

類能以審官庶允至公以明朝典謹錄奏聞謹奏

通議大夫守太常卿上柱國襄武縣開國侯賜紫金魚袋臣權德輿

准制舉自代官正議大夫尚書吏部侍郎上柱國清河縣開國子崔邠

右伏准建中元年正月五日制常參官上後三日舉一人以自代者前件官才茂識精密靜宏達久於右掖再履南宮儀曹取士聲實不惑小宰掄才流品皆叙伏以奉常典禮首冠羣卿古今盛選不可虛授以臣愚薄累奉恩榮前後職官無非忝濫逮今獎命尤懼非宜將何

以叶和神人祇肅郊祀跡邠公望當處大僚循分讓能  
朝有彛典謹錄奏聞謹奏

平章事舉人自代狀

某官某

右伏准建中元年正月五日制常參官上後三日舉一  
人以自代者羣官選任猶合讓能况台司寄重倍百常  
等臣自受恩以來夙夜惶怖必知敗覆無補盛明竊見  
前件官等含章履道忠孝諒直實有宰物之器皆有致  
君之誠足以上承睿謨下決庶政伏乞罷臣袞職以付  
材能則許謨可行授受惟允羣情斯在非敢自私手疏

上陳伏惟鑒聽無任誠懇戰懼之至謹奉狀陳讓以聞  
謹奏

正議大夫守禮部尚書上柱國扶風郡開國公賜紫金  
魚袋臣權德輿

准制舉自代官正議大夫守太常卿上柱國清河縣開  
國子賜紫金魚袋崔邠

右件官器行端茂文學閎深自中書舍人厯禮部吏部  
二侍郎太常卿皆與臣交代諳其事政伏准建中元年  
正月五日制常叅官上後三日舉一人以自代者臣頃  
待罪非據首尾四年無補休明合當遣黜聖慈寬宥猶

守本官受恩之日惶駭失次又蒙特令宰臣奉宣進止  
獎飾慰喻至于再三謂臣更無罪過恐臣妄有憂懇承  
命震灼感入肺肝宰司退免未有斯比實當怵惕之際  
再沐生成之恩臣以遣奉近侍不合申謝慮煩省覽不  
敢拜章輒因舉代之時特荷非常之澤况宗伯秩禮選  
任重難以邠代臣實允公望謹錄奏聞謹奏

東都留守銀青光祿大夫檢校吏部尚書兼御史大夫  
判東都尚書省事上柱國扶風郡開國公臣權德輿  
准制舉自代官朝議大夫守尚書戶部侍郎判度支護  
軍賜紫金魚袋盧坦



右伏准建中元年正月五日制內外官上後三日舉一人以自代者前件官端操敏用秉彜嚮方專席兩臺察廉三郡自理煩處劇再貳六官克茂休聲益彰直道保釐河洛從古重難宏修武備宜得威望揆才量力敢以薦言謹錄狀奏聞謹奏

賀除于頔太子賓客表

臣某言伏見今月二十二日制書以于頔爲太子賓客凡在過咎得以昭洗凡在臣僚不勝慶躍臣某中謝伏惟陛下推誠恤隱宥罪申恩澤深雨露明並日月于頔幸備公相又忝國恩而交私匪人行賄求進惡子兇悍

刑章之文集 卷之五  
虐殺無辜降爲王傅使絕朝謁家居思過用愧其心在  
於聖恩已是私宥今則以其嘗居重任特降殊私進於  
賓護復得通籍載念循省洗其尤違懷生無不遂之人  
負罪有自新之路含養之澤與天同符山東諸侯未朝  
請者必欣戴恩仁浹洽肌骨此誠王者感人心之深若  
也臣嘗備樞近每承音旨衆情不至於睿慮已周古哲  
難行在聖姿則易寬明恤隱遐邇歡心仰戴天慈沐浴  
休運無任抃躍喜賀之至謹奉表陳賀以聞臣某誠歡  
誠賀頓首頓首謹言

謝停賜口臘表

臣某言伏奉今月十七日手詔以諸道每年合送口臘  
及尺旣非厚賜未足申恩以方鎮勞煩道路爲敝一例  
停罷貴適便宜以示臣省恩自九天澤周萬宇伏讀詔  
旨仰荷皇明臣某中謝臣聞務其大者捨其細存其廣  
者遺其狹故先師有寧儉之教禮經有必簡之文陛下  
誠切受人志於求瘼口臘香澤豈均雨露之濡尺寸度  
數曷比乾坤之大以道途勞費傳置將迎鑒在事先慮  
周物表去煩就省約已便人合簡易於二儀燭休明於  
四裔臣謬居分正獲奉德音抃賀之誠倍萬常品無任  
感戴悅懌之至謹奉表陳謝以聞臣某誠歡誠喜頓首

頓首謹言

謝端午賜衣及銀器百索等表

臣某言中使陳忠玠至伏准前月十七日手詔賜臣端午衣一副銀椀二銀砂羅一百索一軸并大將衣服等慶賜遠降天顏如臨恩光綢繆器服輝麗成周士吏居守輿師喜氣歡聲以感以抃臣某誠欣誠荷頓首頓首伏以斗杓建午之初日永星火之際陰陽肇接天地氣交陛下法象乾坤順行時令賀獻本臣子之志寵賚延君上之恩孱微無庸跼蹐斯甚佩長命之縷俾壽而臧捧在笥之衣既安且吉然後大敷渥澤盡感鴻私顧已

難酬此生何幸無任戴荷踴躍之至謹附中使陳忠玠  
謹奉表陳謝以聞臣某誠歡誠抃頓首頓首謹言

請置防禦軍狀

東都留守

今管舊防禦軍官健并陽翟偃師等縣鎮遏及留鎮將  
士共三千八百九十五人七百人舊防禦軍官健准元  
和三年八月十日勅量留一千五百七十八人河陰陽翟  
偃師等縣鎮遏准元和三年五月二十五日勅留守牧  
管一千六百二十五人留鎮將士

右件見管兵士如前其中分在陽翟偃師外鎮并諸色

軍將所由及口僣等並在數內今在都城二千人已下  
極爲寡少臣去年七月五日面辭親奉聖旨欲却置防  
禦軍去年十月十六日又具狀聞奏至今未蒙進止東  
都與淮西地近又少陽丁憂未聞疾狀非輕慮有軍中  
動靜苦無備擬不免憂虞又陽翟去冬口有刼殺亦爲  
在鎮人少所以草竊公行居守寄崇臨制東夏淮西緩  
急切在隄防須假軍聲以重威望以臣庸懦又兵力至  
少夙夜惶懼曠敗是憂在臣至微豈敢逃責但以常備  
重任過承鴻私恐負恩寄有辜任使事理所迫不敢不  
言伏惟聖慮速賜裁擇輕冒塵瀆神爽震驚無任惶懼

殞越之至謹差押衙雲麾將軍守左金吾衛大將軍兼  
試殿中監上柱國成黨奏狀陳請以聞謹奏

論吳少陽起復狀

淮西節度吳少陽

右少陽丁憂已近五十日未有恩命起復除官比來諸  
道節將每有起復皆不如此淹久亦聞少陽疾病頗甚  
如少陽不起卽朝廷因此便可處置况蔡州四面懸絕  
與山東不同伏計聖謨已有前定至如今日起復卽恐  
不可過遲况頃來朝中儒臣文吏如杜祐樊澤路寰皆  
不免有此今若議除替卽須准擬興師師徒一舉勞費

則甚京邑旱儉恐且須安靜養威蓄力以俟其時少陽  
風疾頗甚臣先已聞奏其勢非久可爲後圖東都與淮  
西相近在臣憂虞至切敢以疎遠干冒宸嚴輕瀆上陳  
伏待罪責無任惶悸隕越之至謹奏

謝每年賜錢三千貫文表

臣某言伏奉今月三日勅東都留守額闕宜令度支每  
年支錢三千貫文充雜給用者伏以居守將士仰給有  
司省嗇之中經費猶闕臣頃以地隣淮右事切隄防請  
益師徒以崇威重至於費用未敢陳聞豈謂天澤旁流  
鴻私曲被救乏恤隱已極大君之慈曠官費財益重微



臣之責况違離軒陛周歷炎涼無補盛時有叨重寄恩  
光積厚荅效何階無任感戴悚懼之至謹奉表陳謝以  
聞臣某誠惶誠荷頓首頓首謹言

奏孝子劉敦儒狀

東都留守

孝子劉敦儒年四十九

會祖子玄 祖貺 父甲 住東都從善坊

父甲

右件人名儒史官之家積成教義至性誠孝感動人倫  
母患風狂心緒乖亂無故擄箠常至僵仆或凍於積雪  
之下或曝於赤日之中腐爛皸裂略無完體見其楚毒  
方肯飲食敦儒甦而復起常思人知承順怡然不覺疾

痛因心之道貫於神明欲蓋彌彰事久方著烝烝不匱  
十有六年貞元二年留守韋夏卿具狀奏聞奉其年八  
月二十九日勅宣付史館旌表門閭臣至洛都具詳事  
實聞諸族類布在風謠今又十年不改其養飢寒所迫  
衣食闕然晨昏所奉朝不繼夕伏以底祿筮仕資蔭多  
門至行絕人尤可嘉獎伏望天恩特授一解褐京官使  
分司就養則計食可給寸祿爲榮庶厚時風以宏孝理  
特乞聖慈允臣所請謹錄奏聞伏候勅旨

謝賜冬衣表

臣某言九月二十日中使孟國瑤至伏奉其月十七日

勅書手詔慰諭臣及將佐僧道百姓等併賜臣冬衣兩副大將冬衣共四副者詔旨曲臨慶賜旁集凡在禪校一其懽愉臣某中謝臣自違奉闕庭保釐河洛異戎師式遇之任非封部底貢之勤坐叨各器所謂尸素日月云邁寒暑迭來再及授衣之辰每蒙挾纊之澤被服輕煖章施賤陋彼已不稱於臣則多雖竭捐軀之誠豈逃濡翼之刺撫躬愧畏上荅何階無任慙懼感戴之至謹奉表陳謝以聞臣某誠惶誠恐頓首頓首謹言

請加置留鎮兵二千人狀

右留鎮將士雖有三千八百餘人偃師陽翟登封告成

等分鎮并軍將口儼諸色所由外在都城日勅二千人  
城門街鋪守當悉在其內陽翟當蔡州要路鎮兵不滿  
三百人都城人數已少更分減不得自舞陽刼殺已來  
臣夙夜憂切陽翟只隔襄城便與郟城接界寇盜侵軼  
事資隄防伏請量加置前件人數分在都城及陽翟鎮  
兩處防備所與完守遏其窺覷倘非事理迫切豈敢輕  
黷聖聽謹錄奏聞伏聽勅旨

留鎮將士加置二千人狀

右伏奉今月十四日勅留鎮將士宜加置二千人都城  
及陽翟分鎮仍速令招召精選強壯數足奏聞者臣伏

以都畿宮闕之重四方水陸之衝密邇淮夷兵數鮮少  
安危之計責在微臣夙夜憂惶逼擾是懼陛下神武獨  
運睿略下臨加此新軍保安洛土凡在都邑已如金湯  
敢勵孱庸以膺駟策無任感恩悅懌之至其招召事宜  
已具別狀分析聞奏謹錄奏聞謹奏

請加置兵衣糧狀

右伏奉今月十四日勅留鎮將士宜加置二千人速令  
招召者伏以自元和三年准勅停防禦軍後皆散在坊  
市工庸爲生今令招召揀去老弱又畿內山谷間有武  
力勁悍者四軍留鎮軍子弟有成長強壯者旬日內且

合拾得一千人其餘至後月內並合得足伏以前件人  
等久藉軍籍不免飢寒招募之初須有露賚藉其速至  
必在樂從况當冬賜之時宜均挾纊之澤伏望天恩許  
臣招召入軍者便准舊官健例給冬衣月糧伏望下有  
司且支一千其餘一半待招召有次第後續具聞奏謹  
錄奏聞謹奏

河南尹裴次元充東都副留守

右伏奉今月十九日勅東都留鎮創立新軍所招將士  
切須精選要得府縣共詳簿書况分正副守仰惟舊典  
宜令裴次元以本官充東都副留守者伏以居守之任

分政是崇舊制河尹多兼副職以臣虛薄謬忝保釐陛下俯憂敗闕命此陪貳今淮右狂寇尚稽天誅洛京重地每軫宸慮况新承詔旨創置軍師其於選募多闕府縣以尹守之劇同此在公佐庸菲之材俯矜不逮受恩斯重量力難任見與次元計會於諸色人中設法招召續具條奏無任感恩戴荷之至謹奉狀陳謝以聞謹奏

謹移義成軍一千五百人鎮陽翟狀

准今月十七日勅移義成軍一千五百人鎮陽翟縣右伏奉今月二十日詔勅淮西未寧東都兵少今詔平發步軍一千五百人於陽翟縣鎮守令權取臣指搆與

次元計會差官專往勾當供頓及排比兵馬下處善於  
綏撫無失機宜如淮夷犇衝卽逐便除討若無侵掠但  
且防遏優恤之間必資得所者詔命自天睿獎稠疊捧  
戴惶悚若無所容伏以東畿之中陽翟最重地非巖險  
境接淮夷斯爲要衝實在捍蔽兵力素少疆場是虞忽  
承天書已在睿笑分滑臺之堅甲佐甸邑之偏師戎行  
賈勇河洛增氣臣以懦劣素乏才謀陛下權令指撝假  
以威重謹當下竭庸管上稟睿謀循已何堪省躬知愆  
應緣置頓及到縣下處臣已與次元計會排比差官勾  
當其於撫綏必冀便安候將士等到鎮續具聞奏謹奉



狀陳謝以聞謹奏

謝除太常卿表

臣某言伏奉十月二十四日詔命除臣太常卿統和神人典司禮樂臣實庸菲認叨寵榮臣某誠惶誠恐頓首頓首臣以書生凡輩懦弱無堪生偶昌期累膺爵秩四掌誥命五居列曹遂叨禮卿乃佩相印竟無微效上荅皇明自罷宰相再履宗伯旋忝保釐之任屬當優寄之時淮甸多虞周郊接壤上勞聖慮下輯戎師臣不敢愛身不敢避事頻抗手疏脩陳物宜苟披肺肝莫識忌諱自承詔旨許募新軍實使懦夫增氣輒思仁者有勇繕

修器甲招集驍雄每竭一心敢有貳事陛下憂臣不逮  
全度特深出於殊私遽降新命沐浴皇澤從容大僚量  
力無庸庇身何幸况太常者伯夷叔孫通之職豈易其  
人五六年間再居此地感恩知懼循分難任卽以今日  
三日進發瞻望闕庭踴躍欣抃謹奉表陳謝以聞無任  
感戴喜懼之至臣某誠惶誠恐頓首頓首謹言

應緣遷奉狀制書手詔等

山南西道節度觀察處置等使銀青光祿大夫檢校吏  
部尚書兼興元尹御史大夫上柱國扶風郡開國公臣  
權德輿右臣亡祖松柏先在東都臣幼年流寓江東夙

覺鍾罰亡父母於潤州安措今歲在丁酉是商姓通年  
取四月二十日於潤州啟舉七月十九日於東都遷祔  
臣孤單零丁早失嚴訓寵榮累集霜露感深至於歲時  
難遇吉便常恐忽先犬馬莫展私誠伏以守土理戎不  
敢自求營護欲遣子弟專往不敢不先事上聞謹錄奏  
聞

勅某省所奏請遷祔事具悉卿移孝爲忠嘗竭弼諧之  
志慎終追遠每增霜露之恩無忘在公載陳誠懇眷言  
倚屬喜歎良深所請令子弟專往營護允依來奏想宜  
知悉春煖卿比平安好遣書指不多及二月十五日

臣德輿言伏奉今月十五日手詔許臣遷祔并合子弟專  
往營護者捧承詔書曲遂私志感泣嗚咽激於肝心臣  
德輿誠惶誠荷頓首頓首臣以童齒之年遭家不造壤  
樹所寄權在江南累經追崇當異徽數今龜筮叶吉日  
月有時伏蒙聖慈伏賜鑒察恩詔下降特允懇誠孝理  
所覃幽明知感松楸改卜永異事於九原蒲柳餘年異  
酬恩於萬死無任感戴怵惕之至謹遣押衙朝議郎前  
興元府金牛縣主簿張儂奉表陳謝以聞臣某誠惶誠  
荷頓首頓首謹言

使某官某

右臣伏奉去二月十五日詔命許臣遷祔起四月二十  
日至七月十五日合在准式假內使事請令攝節度副  
使檢校尚書水部員外郎兼殿中侍御史樊宗師勾當  
其府事請令少尹王士良勾當其間四使各有判官若  
事關師旅錢穀稍要重者并須有聞奏者臣自躬親不  
敢闕事謹錄奏聞伏聽勅旨元和十二年四月十日使  
奏

勅旨宜依四月十九日

使某官某 亡祖右羽林軍錄事參軍倕

右臣亡祖仕於開元天寶之際文行聲實推重士林稟

命不融竟沉下位與當時清名之士席建侯包容蘇源  
明友善特深唱酬文章各在集錄義方流澤以及先臣  
忠孝名節聞於天下累蒙追錫備極哀榮逮至微臣寔  
荷祖訓猥以瑣劣過叨鴻私今檢校官兼官並至三品  
勲官及爵並至二品玷冒斯甚曠敗是憂况臣本官興  
元尹足領當道使務理戎撫俗不假他官其檢校吏部  
尚書兼御史大夫并散官勲爵並乞削免迴充亡祖追  
贈則殘生展霜露之感幽壤荷日月之光今先臣改葬  
轉祔就路亡祖舊域松楸是依倘因此時特沐恩禮使  
貽厥之報俯遂良誠罔極之懷下申先志聖朝孝理橫

絕古今悽悽肝血敢此披瀝無任哀懇迫切之至謹遣  
進奏官押衙朝議郎前金牛縣主簿張儂奉狀陳乞以  
聞謹奏

奉進止權某在遷舉假內尋常公事任各差官勾當如  
有勅使及別奉詔命卽令權服慄服受進止四月二十  
九日

勅代必生賢爰追祖德恩當被遠用示朝章山南西道  
節度管內支度營田觀察處置等使銀青光祿大夫檢  
校吏部尚書兼興元尹御史大夫上柱國扶風郡開國  
公食邑二千戶權某亡祖故右羽林軍錄事叅軍極舍

和體仁克已存道五常佩訓一命滋恭服先儒之大倫  
知穀也之有後謀孫是慶祚以公台歸葬惟時光乎邱  
壠佳域再啓緝禮宜申飾彼泉扃寵茲郎位式獎列藩  
之重且彰漏澤之榮可贈尚書禮部郎中五月十九日  
臣德輿言伏奉今月十九日制命臣亡祖右羽林軍錄  
事參軍倅追贈尚書禮部郎中號捧詔書欽承追錫聖  
慈孝理輝耀幽明流根漏泉感涕嗚咽臣某誠惶誠荷  
頓首頓首亡祖德風自振才命不倫人文推於士友天  
爵茂於仁義微臣虔守家法祇荷門風逮事之養不申  
貽謀之慶斯集累叨將相備極名器臧孫有後豈臣敢



當陳群慙德在臣爲甚乃者以改卜封樹輒披肺肝因  
先人之祖載加王父之徽命乞上印綬以延哀榮豈謂  
微誠竟回聰聽德音煥發贈典褒優飾卽位以彌綸被  
大夫之物采儀曹縛禮幽壤生光恩波曲臨負戴無力  
將誓畢命以荅殊私無任感恩哀荷之至謹差進奏官  
某乙奉狀陳謝以聞臣某誠惶誠恐頓首頓首謹言元  
和十二年五月二十七日使上表

勅某省所奏請迴檢校官及兼追贈亡祖事宜具悉卿  
位更將相委重藩方褒贈自是典章豈必更迴官秩因  
心志切報本誠深已詔追榮良增嘉歎想宜知悉夏熱

卿比平安好遣書指不多及閏五月五日

臣德輿言伏奉今月五日手詔以臣亡祖喪贈自是典章豈必更廻官秩已詔追榮良增嘉歎者渥澤滂濡詔旨嘉獎捧戴哀絕感恩失圖臣某誠惶誠荷頓首頓首臣叨逢聖明付授踰量常慮顛墜不任駢策况以藩方之重豈假臺省之兼昨因遷祔輒有陳乞所願少減名器獲申哀榮仰塵黻纁懼在鼎鑊豈謂天道下濟懇誠上通三復詔命五情震駭僞飾備至發於聖心弱質無膺旣玷聿修之德湛恩難報益馳匪懈之誠無任哀惶感荷之至謹遣進奏官押衙朝議郎前行興元府金牛

縣主簿張儼奉表陳謝以聞臣某誠惶誠恐頓首頓首  
謹言

使某官某

亡父贈太子太保某

右臣亡父取七月十五日於東都遷祔贈官是一品准  
式合有鹵簿幔幘人夫等謹錄奏聞伏聽勅旨

奉勅宜付所司准式

使某官某

右伏准去二月十五日詔命許臣遷奉自四月二十日  
至七月十五日合在假內今准假滿以今月十六日勾

當軍府公事謹錄奏聞謹奏

權載之文集卷第四十六

Harvard Library

開化圖書館

Kaichua library

開化圖書館

Kaichua library



開化圖書館

Kaishwa Library

開化圖書館

Wakuhwa Library



Blue Cyan Green Yellow Red Magenta White 3/Color

TIFFEN Color Control Patches © The Tiffen Company, 2007

Centimetres

1 2 3 4 5 6 7 8 9 10 11 12 13 14 15 16 17  
1 2 3 4 5 6 7

權載之文集

開化圖書館  
Kashima library

七

開化圖書

Kaishwa Library



Inches 1 2 3 4 5 6 7  
Centimetres 1 2 3 4 5 6 7 8 9 10 11 12 13 14 15 16 17

**TIFFEN** Color Control Patches © The Tiffen Company, 2007

Blue Cyan Green Yellow Red Magenta White 3/Color